

MGA
REBOLUSYONARYONG
PAHAYAG
SA ISLA
SANG NEGROS
(MARSO 2024)

KAUNDAN

Nagsala si Gen. Brawner, indi mawasak ang NPA sa Visayas	5
Magabun-ag sang mas dalagku pa nga pagbato sang pumuluyo ang pasismo sang estado	9
Negrosanons see right through 3rd ID's lies	11
Linibu-libo nga pamatan-on ang manubli sa armas ni Hannah Jay "Ka Maya" Cesista! Hustisya para sa Bilar 5!	14
Mabuhay si Ka Jandy! Iloy, Pulang hangaway, Rebolusyonaryo!	16
Arrest of fictional NPA squad leader, discovery of imaginary arms cache highlight AFP's desperation	19

Pagbaha sang mga tropa sang AFP sa tunga sang El Niño, ginakundenar sang ASJC-NPA	21
NIR Indi Sabat sa Ginagutom nga Pumuluyo sa Central Negros	24
AFP covers up disproportionate use of firepower with fake 'NPA arms recovery'	26
Sukton ang Numero Uno nga Kriminal kag Berdugo nga 62nd IB	30
Doble nga pag-antus sa masang mangunguma ang dala sang wala untat nga militarisasyon sa tunga sa pagpanghalit sang El Niño	33
Wala sang Lehitimo nga Engkwentro sa La Libertad, Negros Oriental	36
Kriminal kag Kawatan sa Guihulngan nga Gina-uyatan sang 62nd IB, Ginsilotan sang NPA	38

Ipatuman ang kahublagan panadlong!
Manikasog para mapasulong ang
inaway banwa sa isla sang Negros! 40

Pursigido nga Tادلunon ang mga
Kasaypanan kag Isulong ang Inaway Banwa
sa Mas Mataas pa nga Halintang 60

Itib-ong ang pungsodnon demokratiko nga
rebolusyon! Paigrabon ang kalayo sang
inaway banwa! 66

Nagsala si Gen. Brawner, indi mawasak ang NPA sa Visayas

*Ka Maoche Legislator, Tagpamaba sang AGC-NPA
Marso 1, 2024*

Ginatikal ni Armed Forces of the Philippines (AFP) chief Gen. Romeo Brawner Jr nga malaumon siya nga malab-ot ang ila bug-os nga kadalag-an batok sa mga "nagkalabilin (remnants) nga NPA" sa Visayas sa katapusan sang 2024. Apang ang brutal kag tinalawan nga pagmasaker sang 47th IB kag PNP sa lima ka hors de combat sa Bohol kag ang pagpangbomba sa Trangkal Range sa Escalante City, lakip na ang pagpatay kay Jose Caramihan, isa ka ordinaryong mangunguma, nagapakita lang sa mahigko kag mapintas nga hinimoan sang AFP kag kapulisan agud ipadayag sa publiko ang peke nga kadalag-an sa ila kampanya kontra-insurhensya.

Sa tunga sang pasulit-sulit nga pag-isdog sang AFP sa dedlayn sang pagtapos sa NPA, maathag nga indi gusto ni Brawner kag sa iya Commander in Chief nga si Marcos Jr nga mag-ako sa kapaslawan sang ila tuyo nga wasakon ang rebolusyonaryo nga kahublagan.

Indi mawasak ang NPA bisan san-o. Ginpamatud-an sa masobra 55 ka tuig nga paglungtad sang NPA idalom sa pagpamuno sang Communist Party of the Philippines (CPP) ang pagkamakatarunganon sang inaway banwa nga ginalunsar sini upod ang wala paghubas nga suporta sang masa. Samtang magpabilin ang garuk nga sistema nga malakolonyal kag malapuydal, magadamo pa ang magbato kag handa nga maghalad sang ila kabuhi dira sa armado nga paghimakas.

Sa ini nga diwa, ginahatag sang Apolinario Gatmaitan Command-New People's Army Negros Island Regional Operations Command (AGC-NPA), upod sa tanan nga mga larangan gerilya sa bilog isla, ang

pinakamataas nga pagpasidungog kay Domingo Compoc (Ka Silong ukon mas kilala nga Ka Laser sang mga masa sa Negros) kag Alberto Sancho (Ka Juaning) nga lakip sa lima ka Pulang hangaway nga brutal nga ginmasaker sang mga elemento sang 47th Infantry Battalion-Philippine Army kag tropa sang Philippine National Police (PNP) sa Sityo Matin-ao 2, Brgy. Campagao, Bilar, probinsya sa Bohol sadtong Pebrero 23.

Suno sa mga nakasaksi, wala sang engkwentro nga natabo sa nasambit nga lugar. Buhi pa sila Ka Laser kag Ka Juaning kag ang tatlo pa nga mga kaupod sang gindakop sang mga mersenaryong militar kag kapulisan. Nagbatayg sang sakit nga arthritis si Ka Laser kag wala na kapasidad nga magbato.

Imbes nga irespeto ang kinamatarung sang lima ka Pulang hangaway bilang prisoners of war, nakaagum sila sang tortyur sa kamot sang berdugong 47th IB kag PNP. Ginpaligid sila sa lunang kag gintiro, luwas kay Ka Laser. Ginbuno sa liog kag ginriri ang iya tiyan nga kabangdanan sa iya kamatayon. Ini athag nga bayolasyon sang 1949 Geneva Convention kag Additional Protocol 1 of 1977.

Daku ang pagpalangga sang masang Negrosanon kay Ka Laser kag Ka Juaning. Nangin kabahin sila sa pagpauswag sang rebolusyonaryo nga kahublagan sa isla sang Negros.

Si Ka Laser naghalin sa probinsya sa Bohol kag malawig na nga naghulag sa ila lugar sumugod 1980s. Tuig 2007, nadeploy siya sa Southeast Negros kag pagkatapos sini, gin-asayn man sa southwest nga bahin sang Negros sadtong 2015. Pagkatapos sini, liwat siya nga gindeploy sa Bohol sadtong 2017 bilang Platoon CO kag Deputy Secretary sang Bohol Provincial Committee.

Antes gindeploy sa Negros si Ka Laser, daku ang iya kontribusyon sa pag-uswag sa isa ka sonang gerilya sa Bohol. Nakabulig siya sa

pagbreyktru sa rebolusyon agraryo kaangay sa pagpataas sa bahinay sang ani pabor sa mga saop sa panahon sang Ikaduha nga Dungganon nga Kahublagan Panadlong (IDKP). Daku man ang iya amot sa pagpapagsik sa mga likom nga organisasyon masa sa Bohol.

Bantog man ang papel ni Ka Laser sa mga taktikal nga opensiba sa Bohol. Pinakatingkad nga ginpakigbahinan niya ang reyde nga wala lupok sadtong 1999 sa hedkwarters sang 7th PNP-Regional Mobile Group Combat Support Coy (RMG-CSC) sa Brgy. Rizal, Batuan, Bohol kung sa diin nakakuha ang NPA sang 80 ka M16, isa ka M60 machine gun kag isa ka 60mm mortar.

Samtang, si Ka Juaning nagbulig sa dayag nga kahublagan masa sa sayong bahin sa 2010 sa Negros Oriental kag nagpultaym sa NPA sa ulihing bahin sa sina nga tuig.

Naghulag si Ka Juaning sa paghimakas masa sa imol nga taga-syudad halin pa sa 1980s. Sadtong 1987, gindakop siya sa mga pwersa sang reaksyonaryong estado bangud sa iya pagsuporta sa armadong partisano. Nakombikto siya sadtong 1994 kag gindala sa National Bilibid Prison (NBP). Isa siya sa nanindugan sa IDKP kag nagbulig sa pagpabakud sa panindugan sang mga bilanggong pulitikal sa NBP. Matapos nga nakaguwa sa prisohan sa ulihi nga bahin sang 1990s, nagbalik si Ka Juaning sa paghulag sa paghimakas masa sa Cebu.

Dapat nga pasabton ang AFP kag PNP sa ila makasiligni nga krimen sa pagmasaker sa lima ka Pulang hangaway. Nagsala ang mga berdugong militar kag kapulisan sa ila pagpati nga paagi sa ila modus nga pagmasaker kag pasabwag sang kakugmat sa kaumhan maghuyang ang NPA, sa Visayas man ukon sa bilog pungsod.

Mangin inspirasyon sa mga Pulang hangaway kag sa bilog rebolusyonaryo nga kahublagan ang paghalad sa kabuhi sang mga rebolusyonaryo nga martir kaangay kay Ka Laser kag Ka Juaning.

Magpabilin nga buhi ang ila rebolusyonaryong diwa dira sa aton
padayon nga pagsulong sa demokratiko nga rebolusyon sang banwa
agud maangkon sa pumuluyo ang bwasdamlag nga may ara matuod
nga kalinong kag kahilwayan. #

Magabun-ag sang mas dalagku pa nga pagbato sang pumuluyo ang pasismo sang estado

*Ka Dionesio Magbuelas, Tagpamaba sang MCC-NPA
Marso 7, 2024*

Damgo lang ang handum ni Armed Forces of the Philippines (AFP) chief Gen. Romeo Brawner sa iya ginawakal nga wasakon na sang pwersa sang reaksyonaryo nga militar ang New People's Army (NPA) kag bilog rebolusyonaryo nga kahublagan sa Visayas sa subong nga tuig.

Halin nagligad semana pa ini ginatikal sang mga opisyal militar sang AFP, ilabi na sang Visayas Command (VISCOM) kag 3rd Infantry Division, bangud kuno sa sunod-sunod nga mga kadalag-an sang ila operasyon militar.

Lakip sa bogus nga mga kadalag-an sang AFP ang asud-asod nga pagpanganyon kag pagpangbomba gamit ang ila mga air assets sa mga komunidad sang mga mangunguma partikular sa Sityo Mansulao, Barangay Pinapugasan, Escalante City, Negros Occidental sadtong Pebrero 22 sang aga kag gab-i, pagpanghulog sang 500-pound nga bomba kag pagpangayon sa tatlo ka mga barangay nga sakop sang San Joaquin, Iloilo sadtong Pebrero 28, kag ang makasiligni nga pagmasaker sa lima ka katapo sang NPA sa Barangay Campagao, Bilar, sa isla sang Bohol, sadtong Pebrero 23.

Ang nasambit nga mga operasyon militar ang hugot nga ginakondenar sang nagkalain-lain nga Human Rights advocates lakip na sang mga tawong simbahan bangud paglapas ini sa internasyunal nga makitawhanon nga laye kag sa Comprehensive Agreement on Respect

for Human Rights and International Humanitarian Law (CARHRIHL), kag nagtuga ini sang tuman nga kakugmat sa mga komunidad sang mangunguma.

Ang mga ginlunsar nga lapnagon kag masingki nga operasyon militar sa bilog pungsod nagapakita lang sa desperasyon sang AFP nga matapos na ang "internal security problem" para mapukos na ang ila atensyon sa "eksternal nga depensa" sandig sa presyur sang imperyalistang US tungod gusto sini nga gamiton ang Pilipinas sa pagpasingki pa sang kinagamo sa West Philippine Sea batok sa pungsod China. Resulta sini ang paggamit sang AFP sang pinakabrutal kag makasiligni nga pamaagi agud tapnaon ang tanan nga porma sang paghimakas sang pumuluyo, armado man ukon ligal nga demokratikong paghimakas.

Ang wala untat kag pokus nga operasyon militar sang AFP mas nanging makahalalit kag lubos nga nagaguba sang palangabuhian sang mga mangunguma sa kabukiran nga nagapanguna man nga biktima sang mga pasistang suldado. Dugang ini nga kabudlayan sang pumuluyo kadungan sa pila ka bulan na nga pag-antus nga dala sang El Niño. Kasubong man, wala sang kongkreto nga sabat ang rehimen US-Marcos II kag mga LGU sa malawig na nga demanda sang pumuluyo kaangay sang matuod nga reporma sa duta, pungsodnon nga industriyalisasyon, makabuhi nga sweldo kag benepisyu, hustisya sosyal kag iban pa.

Mas dapat magkabalaka si Gen. Brawner kag ang iya mismo Commander in Chief nga si Marcos Jr bangud ini tanan nga mga kondisyon ang nagatuga sang mas madasig nga pagbaskog sang nagkalain-lain nga porma sang paghimakas sang pumuluyo. Ang pasismo sang estado ang magabun-ag sang mas dalagku pa nga pagbato sang pumuluyo, lakip na sang masang Negrosanon sa South Central Negros, kag pagbaskog sang armadong paghimakas sa bilog pungsod. #

Negrosanons see right through 3rd ID's lies

*Ka Maoche Legislador, AGC-NPA Spokesperson
March 10, 2024*

MGen. Marion Sison cannot do anything but whine because he cannot credibly deny the brutal massacre of five Red fighters in Bilar, Bohol, the killing of farmer Jose Caramihan in Escalante City, Negros Occidental and the aerial bombing and artillery shelling in Escalante City and another in San Joaquin, Iloilo last month. These are all clear violations of international humanitarian law committed by soldiers under Sison's command as 3rd Infantry Division chief. Therefore, he is also very much accountable.

The people themselves have witnessed and many of them were also victims of the monstrous crimes perpetrated by reactionary state forces. No amount of deodorizing can hide the stink of Sison and his lackeys' mouths that spew lies and disinformation.

Sison insists that the whole of nation approach is effective in Western and Central Visayas but their measure of success are vile such as the number of civilians they force to surrender as members or supporters of the New People's Army (NPA), the number of civilians and hors de combat they kill, the number of communities they terrorize and, most important for greedy top dogs, the big sums they are able to corrupt from costly military operations, the surrender fund and token community projects like the Support Barangay Development Program.

The commanders and generals of the Armed Forces of the Philippines (AFP) can only boast of the size of their forces, the number and power

of their firearms and artillery, their helicopters and attack planes, 500-lb bombs, and spy planes and surveillance drones. But that is all they have.

The AFP does not have the unfathomable support of the masses because it launches a fascist, anti-people counterrevolutionary war. On the other hand, the people embraces the justness of the armed struggle waged by the NPA under the absolute leadership of the Communist Party of the Philippines (CPP) and takes active part in it. That is the NPA's bottomless source of strength.

The troops of the AFP have shallow political unity. They have low morale and motivation to fight because most are only after a hefty salary. They are angry for being made into cannon fodders by their ambitious generals. They are demoralized by deep-seated military corruption. They are ashamed of the deception being propagated to hide the piling crimes of their ranks and officials.

In contrast, Red commanders and fighters are binded by firm political unity to achieve national liberation and democracy. This political consciousness engenders mutual understanding and respect between comrades. The NPA is also ready to surmount sacrifices and difficulties in the spirit of serving the people.

The 3rd ID launches sustained and focused military operations and uses its military might to spread fear in Negros Island. But the countryside is still relatively vast and the Negrosanon masses untiringly support their genuine army, the NPA. Through waging extensive and intensive guerrilla warfare in an ever widening and deepening mass base, the NPA can turn the tide and seize victory.

Therefore, the revolutionary armed struggle will persist beyond the likes of MGen. Sison and even his boss, Visayas Command chief Benedict Arevalo.

Sison brazenly leads an army division that ensures the people are shackled to the interests of the ruling class of big compradors and landlords. His desperate words are betrayed by the bloody record of the 3rd ID. Negrosanons see right through his endless lies. #

Linibu-libo nga pamatan-on ang manubli sa armas ni Hannah Jay "Ka Maya" Cesista! Hustisya para sa Bilar 5!

Kabataang Makabayan-Southwest Negros
March 13, 2024

Ang Kabataang Makabayan-Southwest Negros nagahatag sang amon pinakamataas nga pagsaludo kag pagpasidungog sa mga rebolusyonaryong martir ilabi na sa pareho namon nga pamatan-on, Hannah Jay "Ka Maya" Cesista, isa ka abogado nga gindakop-patay upod nila Domingo Compoc (Ka Laser), Albert Sancho (Ka Juaning), Parlito Segovia (Ka Aldrin), kag Marlon Omosura (Ka Darwin) sa Brgy. Campagao, Bilar, Bohol sadtong Pebrero 23, 2024.

Hugot namon nga ginakundenar ang pagmasaker sa Bilar 5. Wala sang kamatuoran kag dugang lang sa mga serye sang peke nga engkwentro ang ginpapalapa sa mga nagapanguna nga "fake news peddler" sang Armed Forces of the Philippines (AFP) kag Philippine National Police (PNP). Nasaksihan mismo sang mga pumuluyo nga gindakop ang lima ka Pulang hangaway antes ginmasaker sa ila atubang agud magtanom sang kahadlok kag mapunggan ang masang mangunguma nga maghimakas para sa ila kinamatarung kag demokrasya.

Ang ginhimo sang mga berdugo nga AFP-PNP sa Bilar 5 wala sang kinatuhay sa mga pagpatay sa mga hors de combat diri sa isla sang Negros. Wala huya nga ginlapas sang militar kag kapulisan ang mga kasugtanan sa Geneva Conventions kag Comprehensive Agreement on

Respect for Human Rights and International Humanitarian Law (CARHRIHL).

Indi sayang ang kabuhi nga ginhalad sang Bilar 5 kag sa linibu-libo nga martir sang rebolusyon. Nagakaangay nga sundon ang ila rebolusyonaryo nga banas ilabi na ni Ka Maya. Partikular nga kuhaan naton sang inspirasyon ang iya rebolusyonaryo nga diwa.

Bilang isa ka abogado, namuklat si Ka Maya sa lapnagon nga paglapas sa tawhanon kinamatarung, kag sang mga makasiligni nga mga krimen sang rehimen Marcos Jr paagi sa mga pasista nga mga ido-ido sang AFP-PNP sa kasyudaran man ukon sa kaumhan. Ini nga krisis naghangkat kay Ka Maya nga magbiya sang iya komportable nga kabuhi kag mag-amot sa iya kinaalam kag propesyon para sa ginapigos kag ginahimuslan nga pumuluyo kag sa rebolusyon.

Sa atubang sang nagapermi nga krisis sang malakolonyal kag malapyudal nga sistema, wala sang kasanag ang buwas damlag sang mga pamatan-on. Ginadingutan ang pamatan-on sang edukasyon, ginprograma nga daw mga robot paagi sa mga neoliberal nga polisiya sa edukasyon, kag ginahimo nga gatasan sang barato nga kusog pangabudlay.

Sa garok nga sistema nga mala-kolonyal kag mala-pyudal, wala untat nga mag-ilig ang dugo sang mga bag-ong pamatan-on nga mag-usoy sa banas sang armado nga rebolusyon. Linibu-libo pa ang magsugpon sa kabuhi ni Ka Maya kag manubli sang iya armas agud maangkon ang pungsodnon nga kahilwayan kag demokrasya. Mga pamatan-on magpasakop na sa NPA!

Hustisya para sa Bilar 5!

Mabuhay ang mga rebolusyonaryong martyr! #

Mabuhay si Ka Jandy! Iloy, Pulang hangaway, Rebolusyonaryo!

***Makabayang Kilusan ng Bagong Kababaihan-Southwest Negros
Marso 13, 2024***

Ang Makabayang Kilusan ng Bagong Kababaihan (MAKIBAKA)-Southwest Negros taas-kamao nga nagapaabot sang amon hugot nga pagsaludo kay Emmarie "Ka Jandy" Pastidio, isa ka iloy, Pulang hangaway kag rebolusyonaryo. Sadtong Pebrero 21, 2024, namartir si Ka Jandy upod si Ka Jorge (Joshua Sultan) sa isa ka engkwentro sa Sityo Mansulao, Barangay Pinapugasan, Escalante City, Negros Occidental.

Ginapaabot namon ang amon pagpangasubo sa mga abyan kag pamilya nila Ka Jandy kag Ka Jorge ilabi na sa iya banahon nga si Ka Peeta, isa man ka Pulang hangaway, kag sa iya anak nga si Baby Marx Cairo Salino nga tubtob subong, ara pa gihapon sa kamot sang reaksyonaryong estado paagi sa NTF-Elcac.

Mabakod nga nanindugan si Ka Jandy sa rebolusyon tubtub sa iya kamatayon. Masalimuot ang nangingin kabuhi ni Ka Jandy nga naghatag kabakud sang iya panindugan nga lubos panahon nga mag-alagad sa masang mangunguma. Puno sang kaisog kag determinasyon niya nga gin-atubang ang mga pagpamintas, pagpanghimulos kag pagpamigos nga bunga sang burges-pyudal nga panan-awan sa kababainhan sang sosyedad.

Antes nagpasakop sa New People's Army (NPA), nangingin pamatan-on nga organisador pangkultura si Ka Jandy sa nabukid nga bahin sang San Carlos City, Negros Occidental. Gindakop siya upod ang isa pa ka organisador sang 2018 kag napaidalum sa mental torture kag

pagpamahug sang terorista nga tropa sang 79th IB sang Armed Forces of the Philippines (AFP). Sadtong Enero 13, 2021, gin-abdak siya sang nag-maternity leave agud maatipan ang duha ka bulan niya nga bata nga si Baby Marx. Indi matupongan ang sakit nga naagum ni Ka Jandy sang pilit nga ginhamulag sa iya ang iya bata. Iya man nga gin-antus ang mental torture kag pisikal nga pagpanghimulos pareho sang pagsunog sang sigarilyo sa iya nga lawas kag paglugos sa iya sang mga wala kaluoy nga soldado sang 79th IB sulod sa 10 ka adlaw.

Bisan amo ini ang mga inagihan ni Ka Jandy, wala niya ginbaylo ang iya rebolusyonaryo nga panindugan para sa paltik nga kahilwayan paagi sa programa nga amnestiya sang reaksyonaryo nga estado. Wala nagpabaya si Ka Jandy sa iya pagka-ilo kay Baby Marx kundi ginhungod mismo sang reaksyonaryo nga estado paagi sa NTF-Elcac nga dingutan siya sa iya bata. Ginhimo nga siod sang pasista nga rehimen si Baby Marx agud mapasungka si Ka Jandy kag Ka Peeta. Namartir si Ka Jandy nga wala makita liwat ang iya bata.

Indi makatarunganon ang paghimo kay Baby Marx bilang hostage sang NTF-Elcac sa sulod sang tatlo ka tuig kag lapas ini sa internasyunal nga laye sang gyera kag internasyunal nga makitawhanon nga laye kaangot sa ispesyal nga proteksyon sang mga lapsag, mga kabataan kag sa mga busong.

Ginpakita sa kabuhi ni Ka Jandy ang kadesperado sang rehimen Marcos Jr nga tapuson na ang armado nga rebolusyon, apang indi ini malutos tubtub indi magabot ang ugat sang burges-pyudal nga sistema—ang imperyalismo, pyudalismo, kag burukrata kapitalismo. Tubtub indi pa mahilway ang ginapigos kag ginahimuslan ilabi na ang mga kababainhan, magadamo pa ang mga kababainhan nga makigbahin sa pungsodnon demokratiko nga rebolusyon.

Ginapanawagan man sang MAKIBAKA-Southwest Negros sa tanan nga mga progresibong organisasyon sang kababainhan, mga

tagasakdag sang kinamatarung sang mga kabataan kag sa tanan nga progresibong pwersa nga magtib-ong para sa kampanya sa paghilway kay Baby Marx.

Mabuhay si Ka Jandy!

Mabuhay ang mga rebolusyonaryong kababainhan!

Free Baby Marx! #

Arrest of fictional NPA squad leader, discovery of imaginary arms cache highlight AFP's desperation

*Ka Cecil Estrella, RJPC-NPA Spokesperson
March 13, 2024*

The Rose Jean Pelle Command (RJPC) of the New People's Army in Northern Negros dismisses as pure fiction and fake news the reported arrest on Saturday of one of its "squad leader" in Cadiz City.

Combined elements of PNP and AFP units apprehended Eliseo Along, 38, in Hacienda Tresing, Barangay Andres Bonifacio on March 9. He was presented to news media as an NPA squad leader who took part in the February 21 Escalante City encounter.

As per RJPC-NPA records and roster of personnel, Along is not an active member of any NPA unit in Northern Negros, much more a squad leader. He was once a member of the NPA, but went AWOL almost two years ago unable to remould his outlook and mend his anti-social ways involving gambling, drinking and womanizing. He later on surrendered to the AFP and received tasks as one of their intelligence assets.

The AFP's #DiMasaligan79IB must be desperate enough to use as prop such shady character just to sustain the projection of a winning image.

Such high level of desperation is unsurprising given its utter failure to crush a small guerrilla unit even with overwhelmingly preponderant force supported by air assets squandering millions in the process that should have been allocated to drought affected Negrosanons.

Meanwhile, RJPC-NPA scoffs at the so-called arms cache unearthed in Barangay Washington, Escalante City recently as a poorly and precipitously prepared display of rusty homemade firearms and some munitions that are obviously recycled, fabricated or planted. It is another drama from #DiMasaligan79IB's fake news scripts.

NPA units in Northern Negros do not maintain an arms cache. All its firearms are in the hands of its Red fighters and local militia forces. In fact, it is short of firearms in relation to the increasing numbers of peasants and youth enlisting in the people's army. #

Pagbaha sang mga tropa sang AFP sa tunga sang El Niño, ginakundenar sang ASJC-NPA

*Ka Andrea Guerrero, Tagpamaba sang ASJC-NPA
Marso 14, 2024*

Sa tunga sang mga nagalitik nga kadutaan kag nagakahubas nga katubigan, ginakundenar sang Armando Sumayang Jr Command-New People's Army Southwest Negros Guerrilla Front (ASJC-NPA) ang wala untat nga pagbaha sang mga tropa sang Armed Forces of the Philippines (AFP) sa sur nga bahin sang Negros nga nanging tublag sa pagpangabuhi sang mga mangunguma. Masobra na isa ka tuig, sugod Enero 3, 2023, ang asud-asod nga mga focused military operation (FMO) kag Retooled Community Support Program (RCSP) sa bilog nga ika-anum nga distrito sang Negros Occidental nga nagsakop sa mga banwa sang Cauayan, Hinobaan, Ilog kag Candoni, kag mga syudad sang Kabankalan kag Sipalay.

Balangang ang pagdeklarar sang AFP nga ara na sa state of stable internal peace and security (SIPS) ang Negros Occidental. Sa sini pa lang nga una nga kwarto sang 2024, indi magnubo sa 10 ka barangay ang ginsakpan sang mga operasyon sang AFP partikular diri sa CHICKS area. Masobra 500 ka kombinado nga tropa sang 15th IB kag 47th IB sang AFP kag Special Action Force kag Regional Mobile Force sang Philippine National Police (PNP) ang nagpatigayon sang FMO sa pihak sang ila deklarasyon nga "dismantled" na ang larangan gerilya diri sa sur sang Negros.

Naglawig sang binulan kag tayuyon ang mga operasyon kombatan. Nagtuga sang sablag kag kahalitan ang ini nga mga operasyon kombatan sa kabuhi kag palangabuhian sang pumuluyo ilabi na sa mga

mangunguma. Ginpaidalum sa 15th kag 47th IB ang pumuluyo sa curfew, paglog-book, pagpaniktik, pagpangransak, pagpamahug, patarasak nga pagpangtiro, pagpangbomba, pagpang-salbeyds kag iban pa. Nangin lapnagon ini bangud sa ila desperasyon nga tapuson na ang insurhensiya sa isla sang Negros.

Sang nagligad bulan Pebrero 2024, ginransak ang balay ni Marjie Campus sa mga tropa sang 15th IB sa Sityo Kantyang, Barangay Caliling kag nakuhaan sang mga personal nga kagamitan. Sang Pebrero 29, 2024, nagtuga sang kahadlok sa mga kabataan sang ginpalibutan sang nagaoperasyon nga mga soldado sa tunga sang gab-i ang balay ni Dodoy Himutra sa Purok 10 Talimagao, Brgy. Camindangan, Cauayan. Ila man nga ginpaidalum sa sarbeylans ang pumuluyo kag mga panimalay.

Nagapakuno-kuno ang mga tropa sang pasista nga AFP nga mga katapo sang NPA kag gintiplang ang masa agud makapangayo sang pagkaon. Ang mga operasyon kombat sang militar wala sang iban nga gintuga sa pumuluyo kundi kakugmat kag kahadlok.

Nagapabilin nga bulag kag bungol ang rehimen ni Marcos Jr sa pag-antus sang pumuluyo ilabi na sa tunga sang El Niño. Labi nga naapektohan sang grabe nga tig-init ang Sur nga bahin sang Negros kompara sa bilog nga Western Visayas. Nagapanguna nga nahalitan ang mga talamnan sa Kabankalan City nga nagabalor sang Php41.7 milyon, ginsundan sang Cauayan (Php14 milyon), Ilog (Php7.4 milyon), Hinobaan (Php2.5 milyon), kag Sipalay City (Php1.6 milyon). Naglab-ot man sa masobra Php157,000 ang halit sa mga kamaisan sa Sipalay City.

Ang halit nga dala sang El Niño dugang nga palas-anon sang mga mangunguma kapin pa sa pagpabaya sang reaksyonaryo nga gobyerno. Imbes nga ialokar ang pondo pakadto sa mga mangunguma, ginbutang mismo ni Marcos Jr ang Php250 bilyon nga pondo para sa

dugang nga pagbakal sang mga bala kag bomba, kag para butaon ang mga bulsa sang iya mga heneral kag mga kroni samtang Php30 bilyon lang ang ginalokar para sa pagbulig sa milyon-milyon ka mga mangunguma. Indi pa seguridad kon magtupa gid ini. Militarisasyon ang sabat sang rehimen Marcos Jr sa gilayon nga bulig nga kinahanglan sang mga masang mangunguma nga natam-an sa El Niño.

Ang ASJC-NPA puno sang determinasyon nga magpamuklat, magorganisa, kag magpahulag sa malapad nga mga masa agud kolektibo maatubang ang kalamidad, mangita sang tubig kag magpalibog paano ini makalab-ot sa mga uma, mapasaka ang sweldo kag benepisyo sa mga mamumugon sa uma, pangapinan ang kinaiyahan batuk sa kapitalista nga pagpanghimulos, kag maduso ang ila demanda para sa gilayon nga ayuda.

Ginpakamalaot man sang rebolusyonarong pwersa sa southwest Negros ang mga proyekto nga palm oil plantation sang dalagko kumprador burges nga Isidro Consunji Jr kag burukrata kapitalista nga mga Araneta nga maga-epekto sa ginatos ka mga mangunguma sa banwa sang Candoni. Hugot man nga ginakundenar ang liwat nga pagsulod sang mga minahan sa Sipalay City.

Ang krisis naton sa klima gintuga mismo sang imperyalismo, pyudalismo kag burukrata kapitalismo. Indi masulbad ang aton ginatubang nga mga krisis kun indi naton mabag-o ang sistema paagi sa armado nga pagrebolusyon.

Nagapanawagan ang ASJC-NPA sa tanan nga pumuluyo sa southwest Negros nga maghiliugyon agud atubangon ang krisis kag sukton ang rehimen Marcos Jr sa iya pagpabaya. #

NIR Indi Sabat sa Ginagutom nga Pumuluyo sa Central Negros

*Ka JB Regalado, Tagpamaba sang LPC-NPA
Marso 14, 2024*

Nagakorus sa pagkinalipay ang mga buaya sa isla sang Negros tuhoy sa Negros Island Region (NIR) nga hagna nga nakalab-ot sa ika-tatlo nga pagbasa dira sa senado. Diplomasiya kag pormalidad na lang ang ginpakita sang senado apang "luto na nga pasayan" ang nasambit nga hagna idalum sa US-Marcos Jr nga rehimen upod sa mga elitista kag maki-imperyalista nga mga alipuris ni BBM sa isla sang Negros.

Nagadako ang nagakanam-kanam nga baba sang mga despotikong agalon mayduta, burgesya kumprador kag burukrata kapitalista sa isla kaangay ni Gobernador Eugenio Lacson, Mayor Albee Benitez kag iban pa para sa ila personal nga negosyo, interes kag luho. Paagi sa NIR, labi pa nga mangibabaw ang kaangay sa ila nga mga buaya agud kontrolon ang ekonomiya kag politika, indi lang sa Negros Occidental nga bahin kundi hugakumon ang poder kag maghakot sang binilyon-bilyon nga korapsyon sa kaban sang pumuluyo sa bilog isla.

Masami, ginatawtaw sa pumuluyong Negrosanon ang "developments, more job opportunities and better social services." Apang sa likod sini tanan, lunsay patalang, pagpanginto kag kutob lang sa hambal paagi sa mga tinikal kag pasalig sang mga tradisyunal kag poderoso nga mga pulitiko sang lokal nga burukrasya sa isla.

Bisan ilabo sa bato, wala sang malauman ang miserable kag gutom nga pumuluyo sa Central Negros sa aktwal nga implementasyon sa hagna nga NIR. Sa ginatanyag nga "development" ukon "pag-uswag" asegurado nga mas magadamo pa nga sahing anakbalhas kag imol nga taga-syudad ang madislokar sa ila puluy-an, duta nga palangabuhian

kag trabaho bunga sang lapnagon nga demolisyon, reklamasyon kag reklasipikasyon sang duta, landgrabbing, mga minahan nga ginpanagiya sang dumuluong kag iban pa nga mga kontra-pumuluyo kag maki-dumuluong nga mga proyekto kag programa sang NIR.

Ang katumanan sang matuod nga reporma sa duta kag pungsodnon nga industrialisasyon maangkon lamang paagi sa armadong paghimakas. Ang demokratiko nga rebolusyon sang banwa ang banas nga pili-on kag paga-usuyan sang ginahimuslan kag pigos nga pumuluyong Negrosanon para sa matuod nga pagbag-o sosyal. Mapasulong ini paagi sa absoluto nga pagpamuno sang Communist Party of the Philippines sa New People's Army (NPA) upod sa malapad nga nagahiliugyon nga prente sang sahing anakbalhas bilang matuod kag nagakaigo nga sabat sa madugay na nga pag-antus sang kadam-an nga pumuluyo sa kagutom kag kaimulon. #

AFP covers up disproportionate use of firepower with fake 'NPA arms recovery'

*Ka Cecil Estrella, RJPC-NPA Spokesperson
March 13, 2024*

After numerous public criticisms directed at the Armed Forces of Philippines (AFP) over the disproportionate use of firepower against AFP's estimated "five NPA remnants" during a "series of gun battles" at the border of Toboso and Escalante City, both in Negros Occidental, last month, the AFP fabricates numerous 'recovered' firearms to save their faces from more public humiliation.

As publicized by the AFP's 3ID Spokesperson and former #DiMasaligan79IB Commanding Officer Lt. Col. J-jay Javines, a total of 16 high-powered rifles (HPR) were recovered by #DiMasaligan79IB after their clearing operations: 10 high-powered firearms (HPR) after the February 21-22 encounter and another six HPRs on February 27.

The Roselyn Jean Pelle Command - Northern Negros Guerrilla Front of the New People's Army (RJPC-NPA) denies that the bulk of said firearms belong to the NPA. Most firearms put on display by #DiMasaligan79IB are planted evidences.

The RJPC-NPA reiterates that no "series of armed encounters" happened, rather only one armed clash between Red fighters and #DiMasaligan79IB soldiers took place in Barangay Pinapugasan, Escalante City on February 21, at about 11am. There was also no armed encounter on February 27, contrary to statements of #DiMasaligan79IB.

It is not surprising at all that the AFP invented a report of such high number of seized war materials. It wants to overshadow its unjustified aerial strike and bombing of Trangkalan Range using two modern units of Augusta Westland-109 Attack Helicopter Nighthawk's machine guns and rockets (a first in Negros Island) against supposed 'five remaining NPAs' which in actuality targeted vast fields of sugarcane plantations, rice fields, and civilian communities; destroying the environment and forcing about a thousand residents to evacuate.

Instead of appearing successful, the AFP's display of manufactured HPR recoveries unwittingly brings their previous false claims to ridiculous levels. Should AFP's claim of less than 10 NPA remnants in Northern Negros be factual, it is laborious (and impractical) for "8 Red fighters" engaging in guerrilla warfare to carry 16 HPRs along with food, medical, propaganda materials and personal belongings. Should the public accept AFP's lies upon lies, can the AFP further claim that RJPC-NPA is now without HPR?

The AFP and its 3ID, 303IBde and #DiMasaligan79IB, in particular, are notorious for planting and/or recycling recoveries against both civilians and the revolutionary movement. They exaggerate military claims to appear victorious.

The latest fake recovery is the reported "NPA arms cache discovered by #DiMasaligan79IB," with the help of revolutionary traitor Richard 'Ka Prince' Gallego, in Sitio Mocabog, Barangay Washington in Escalante City that allegedly recovered a M203 grenade launcher, a .357 revolver and assorted ammunitions.

The RJPC-NPA has listed incidents below where fake recoveries were charged against the NPA or planted as evidence against civilians:

1. January 15, 2024 mis-encounter of reactionary troops reported to transpire in Barangay Camabayobo, Calatrava, NegOcc but actually

took place in Barangay Magticol, Toboso - recovered one Garand rifle, one Carbine rifle and a .38 revolver as reported by #DiMasaligan79IB, while VisCom reported the recoveries to be two Garand rifles and a .38 revolver.

2. October 17, 2023 summary execution of two civilians in Barangay Canlusong, EB Magalona, NegOcc reported by #DiMasaligan79IB as an armed encounter - recovered three M16, one M14, one AR-15, and one Garand rifle.

3. July 8, 2023 in Barangay Maaslob, Calatrava, #DiMasaligan79IB reported to have recovered one M14 and assorted ammos from a supposed 'NPA armory.'

4. April 6, 2023 in Barangay San Isidro, Toboso where after a legitimate armed encounter with the NPA, #DiMasaligan79IB reported to have recovered a number of firearms, including a shotgun.

5. November 16, 2018 in Barangay Washington, Escalante City where after a mis-encounter between units of #DiMasaligan79IB that killed two of their own, they reported that one M16 and a short firearm of NPA were recovered.

Apart from fake recoveries, fake encounters are commonly used by the military to cover up their willful killings of revolutionaries, such as the case of four hors de combat revolutionaries in San Pablo, Manapla, NegOcc on September 2021 and the latest five Red fighters in Bilar, Bohol. Fake encounters are also used by #DiMasaligan79IB to claim a 'score' against the NPA, but it only justifies militarization.

Aside from the latest fake encounters in Barangay Pinapugasan, #DiMasaligan79IB has already concocted 10 fake encounters since their deployment to Northern Negros in 2017.

With these accounts and records of deceitful tactics by #DiMasaligan79IB, how can the AFP expect to win over the morale of their troops and the trust of the people? After a movie-like scene of military prowess using modern armaments, not even a camp or temporary base, nor further body count was reported by #DiMasaligan79IB because all that the AFP does is exaggerate the narrative to their favor.

We challenge the AFP leaders, as well as the PNP, to make public the records, including the serial numbers, of the recovered firearms of the recent Escalante incident, as well as the previous recoveries.

To the ordinary soldiers, policemen, CAFGU members and Barangay officials, live up to your pledge of protecting and serving the people. Expose the lies and brutalities of the AFP and turn your backs on being machineries that cause difficulties to the people.

The RJPC-NPA calls on the Filipino people, especially those of Northern Negros, to resist, spread the truth and expose the AFP's lies.

The revolution lives on! #

Sukton ang Numero Uno nga Kriminal kag Berdugo nga 62nd IB

*Ka JB Regalado, Tagpamaba sang LPC-NPA
Marso 16, 2024*

Sa Central Negros, ang 62nd IB sa pagpamuno ni Col. William Pesase bilang Commanding officer (CO) ang may pinakamalaba nga listahan sang paglapas sa tawhanon nga kinamatarung sa isla sang Negros. Sumugod sa pagpungko ni Marcos Jr sa poder (halin Hulyo 2022 tubtob subong), naglab-ot na sa 22 ka mga mangunguma ang brutal nga ginpamatay sang mersenaryong 62nd IB. Pinaka-ulihì diri ang ginpatay matapos iligal nga gin-aresto kag gintortyur sang tropa militar nga mga senior citizens nga sanday Bernard Torres kag Dionesio Baloy sa Hda. Gomez, Brgy. Sag-ang, La Castellana, Negros Occidental sadtong Enero 17, 2024. Ginpasibangdan si Torres kag Baloy nga mga katapo sang New People's Army (NPA) kag ginhinabonan sang berdugong 62nd IB ang ila nga krimen paagi sa pagpagwa sang peke nga engkwentro. Samtang lima naman ka hors de combat (wala ikasarang nga magbato) nga mga Pulang hangaway ang brutal man nga ginpamatay sang nasambit nga militar sa banwa sang Moises Padilla, Negros Occidental kag Canlaon City, Negros Oriental sa mga tuig 2022-2023.

Idalum sa paghari sang rehimen US-Marcos II, naglab-ot sa 336 ka mga insidente sang human rights violations nga nag-imbolbar sa indi magnubo 10,800 ka biktima (212 ang mga menor de edad) ang ginhimo sang 62nd IB sa pagpamuno ni Col. William Pesasesa sa Central Negros. Ang ini nga mga mahigko nga hinimoan sang 6nd IB ang masobra katunga sang narekord sang National Democratic Front (NDF)-Negros nga 649 ka kaso sang bayolasyon sang tawhanon nga kinamatarung nga ginkomiter sang Armed Forces of the Philippines (AFP) kag Philippine National Police (PNP) nga nag-imbolbar sang

masobra 45,300 ka mga biktima (918 ang mga menor de edad) sa bilog isla sang Negros.

Ang datus nagapakita nga ang 62nd IB paagi kay Col. Pesase makabig nga numero uno nga kriminal kag berdugo nga batalyon sang Philippine Army sa isla sang Negros.

Ang paghatag ni Marcos Jr sang pagpasidungog sa berdugong 62nd IB kag pagpromote kay Pesase tuman ka makahuluya. Tuyo sini nga pataason ang moral ni Pesase kag sang pasistang tropang 62nd IB. Apang ang mga pumuluyo sa Central Negros ang indi na ma-into kag mabutigan. Saksi kag nanging biktima sila sang mga kabutigan, kalakasan kag pagpamintas sang nasambit nga tropa militar bunga sang pasismo kag terorismo sang estado. Rason nga madugay na nga ginakangil-aran sang kadam-an nga pumuluyo ang presensya militar sa mga kaumahan.

Samtang si Marcos Jr nagahatag sang pakunsabo sa mga berdugo nga militar, gina-into man ni Gen. Romeo Brawner sang AFP, Lt. Gen. Benedict Arevalo sang Visayas Command (Viscom), MGen. Marion Sison sang 3rd Infantry Division, BGen. Orlando Edralin sang 303rd Bde kag Col. William Pesase upod sa pasistang 62nd IB ang ila kaugalingon nga "dismantled" na ang mga larangan gerilya sa isla, ilabi na ang Central Negros.

Idalum sa ginapadayaw nga ara na sa state of Stable Internal Peace and Security (SIPS) ang Negros Occidental kag rekomendasyon sang SIPS sa Negros Oriental, dugang nga mag-into sang iya kaugalingon ang nagbulos nga Commanding Officer sang 62nd IB nga si Lt. Col. Evelio Ilanga III. Segurado manalaytay ang oryentasyon kag tatak sang pasismo sa hunahuna ni Lt. Col. Evelio Ilanga III sa liwat nga pagpamintas sa mga pumuluyo sa mga kaumahan sang Central Negros nga mag-ani sang pagbato sang kadam-an nga pumuluyo paagi sa pagpasakop sa NPA.

Ang malaba nga kamot sang rebolusyonaryong hustisya paagi sa rebolusyonaryong kahublagan upod ang lubos nga suporta sang malapad nga masa sang pumuluyo amo ang makahulusga agud sukton ang mga pasista, berdugo, duguan nga kamot kag uhaw sa dugo nga mga opisyal kag tropa militar sang AFP, subongman ang US-Marcos Jr nga rehimen. #

Doble nga pag-antus sa masang mangunguma ang dala sang wala untat nga militarisasyon sa tunga sa pagpanghalit sang El Niño

*Ka Dionesio Magbuelas, Tagpamaba sang MCC-NPA
Marso 17, 2024*

Masobra na tatlo ka bulan nga nagapadayon ang El Niño kadungan sa pag-antus sang pumuluyo, ilabi na sa sektor sang agrikultura. Tubtob subong, wala ukon kulang gihapon sang kongkreto nga tikang ang mga local government unit (LGU) paano mahatagan sang bulig ang mga mangunguma sa mga apektado nga lugar. Magluwas sa tama kahinay nga mga tikang, mas gin-una pa sang mga LGU ang indi gilayon kinahanglan.

Partikular sa Himamaylan City, Negros Occidental nga isa sa pinaka-apektado sang El Niño, mas nangin masako ang LGU sini sa mga proyekto nga wala nagasabat sa mga problema sang mangunguma, hinali man ukon pangmalawigon. Sa unang kwarto sini nga tuig, madamo sang proyekto ang syudad kaangay sang 3,000 ka yunit nga pabalay (nagbalar sang Php4 bilyon), pagtukod sang bag-o nga estasyon sang pulis, pagdebelopar sang sistema sa e-Government Project (nag-digitalize sa mga transaksyon sang LGU) kag iban pa nga indi mapuslan subong sang malapad nga masa.

Sa datos sang reaksyunaryo nga gobyerno, masobra 30,000 ka pumuluyo ang nabikitima sang El Niño sa Himamaylan City, apang hapaw lang ini nga pagsumada sa matuod nga mga apektado sang kalamidad sa kabilogan. Gani, wala pa nakarekober ang mga

pumuluyo sa makahalalit nga bagyo Odette sadtong 2021, nagdugang naman ang subong nga kalamidad sang El Niño.

Kadungan man sang halit sang El Niño ang padayon kag lapnagon nga militarisasyon sa kabukiran sang South Central Negros. Ang presensya sang mga tropa sang 94th IB sa komunidad sang mga mangunguma dugang nga nagadala sang kahalitan sa kabuhi kag palangabuhian sang mga pumuluyo. Gina-imposar sang nasambit nga militar ang curfew sa mga baryo tuhtob sa mga sityo, nagapamilit sila nga iduso ang pagmenoro sang mga kabalayan para mas dasig ang ila pagmonitor sa aktibad sang mga sibilyan, nagapamahug kag nagapang-intimidar gamit ang ila kuno "loud speaker operation," kag nagapangsaka-saka sa mga kabalayan nga ila ginadudahan nga mga supporter sang New People's Army (NPA). Indi na maatipan sang maayo sang mga mangunguma ang ila ulumhan kag kasapatan bangud sa kabalaka sa ila kabuhi samtang ara ang mga soldado sang 94th IB sa lugar.

Tuhtob subong, masobra tatlo ka bulan na nga nagatiner ang tropa sang 94th IB sa proper sang Brgy. Carabalan kag Brgy. Buenavista, sakop sang Himamaylan City, kag nagpatigayon sa ila Retooled Community Support Program (RCSP). Masobra naman isa ka bulan ang operasyon militar sa mga sityo sang Brgy. Tan-awan kag Brgy. Oringao kag masobra duha ka semana na ini sa Brgy. Orong, tanan sakop sang Kabankalan City, Negros Occidental.

Imbes hatagan sang igtalupangod ang kasulbaran sang mga problema sang kakulang ukon wala sang duta, manubo ang sweldo, kakulang sang tubig, manubo nga produksyon sang agrikultura kag ang imedyet nga subsidyo para sa El Niño nga dugang nga nagatulod sang mangunguma sa kapigadohon, militarisasyon ang nagtupa sa mga komunidad sang mga mangunguma kag Indigenous Peoples (IPs).

Magluwas sa mga katalagman nga tuga sang naturalisa, makasiling ang masang anakbalhas sa South Central Negros nga adlaw-adlaw nila nga gina-atubang ang kalamidad sa ila kahimtangan sa kabukiran bangud sa pasismo nga ginasabwag sang 94th IB.

Dugang pa sa ila nga kahangawa sa sini nga panahon ang posibleng paghingalit sa mga naghimbon nga mga burukrata kag burgesya komprador nga mga kumpanya nga naghawan sang dalan para sa pribatisasyon sang serbisyo sang tubig kaangay sang nagkalatabo sa Himamaylan City nga yara na subong sa PrimeWater sang pamilya Villar pareho sang Bacolod City Water District (BACIWA). Indi man magdugay, matabo man sa iban nga mga kooperatiba sang kuryente sa isla ang natabo nga pribatisasyon sang Central Negros Electric Cooperative (CENECO) para ipasabat sa pumuluyo ang problema sang paghatag sang sandigan nga serbisyo.

Handum sang pumuluyo ang kabuhi nga luwas sa katalagman, natural man ukon gintuga sang mga berdugo kag mersenaryo nga militar. Rason nga bisan ano pa nga pagtinguha sang Armed Forces of the Philippines (AFP), ilabi na sang 94th IB, sa mando sang ila Commander in Chief nga si Marcos Jr nga wasakon ang armado nga paghimakas, indi magahubas ang bubon sang mga magpakigbahin sa NPA. Sa pihak sang paglala sang El Niño, tuman man kainit ang kagustohan sang masang anakbalhas sa South Central Negros kag sa bilog isla nga mahilway sa gapos sang pagpanghimulos kag pagpamigos paagi sa paglunsar sang demokratiko nga rebolusyon sang banwa. #

Wala sang Lehitimo nga Engkwentro sa La Libertad, Negros Oriental

*Ka JB Regalado, Tagpamaba sang LPC-NPA
Marso 23, 2024*

Mabaskog nga ginapakamalaot sang Leonardo Panaligan Command-New People's Army (LPC-NPA) ang lapnagon nga pagpang-abuso sang berdugong tropa sang 62nd IB sa pagpamuno ni Lt.Col Evelio Ilanga III sa mga mangunguma sa Central Negros.

Sadtong Marso 15, 2024 alas 9:18 sang gab-i, natublag ang mahamuok nga katulugon sang mag-asawa nga sanday Maribel kag Randy Pecore sang Sityo Talaon, La Libertad, Negros Oriental sang ginpaarakan ang ila panimalay sang platun nga tropa sang pasistang 62nd IB. Pagkaaga Marso 16, ginbantala naman sang militar nga engkwentro sa tunga sang NPA kag nasambit nga tropa militar.

Ang matuod wala sang yunit sang NPA sa lugar. Wala man sang kamatuoran nga may shotgun nga nakumpiska ang militar. Ini lunsay mga kabutigan kag gusto lang sang 62nd IB nga hinabunan ang ila palpak nga operasyon.

Ginakondenar man sang LPC-NPA ang paglusob sang militar sa panimalay Cantela sang sityo Pitik-pitik, Brgy Luz, Guihulngan sadtong Marso 20, 2024 alas 6:00 sang aga. Ginsaka, ginransak, ginukay ang mga kagamitan, gintamnan sang .357 caliber pistol kag Engram ang nasambit nga panimalay kag iligal nga gin-aresto si Ronald Cantela. Si Cantela ang tumandok nga mangunguma kag sibilyan sa lugar.

Ang kapintas nga ginahimo sang 62nd IB sa pumuluyo sang Central Negros ang indi na bag-o kundi tatak na sang nasambit nga batalyon

ang berdugo kag pasista sa balayon sang pasismo kag terorismo sang estado.

Samtang ginabuyagyag sang pumuluyo sa mga kaumhan sang Central Negros ang kalakasan militar, ang NPA magalunsar sang lapnagon nga taktikal nga opensiba para pabayaron sang dako ang berdugong 62nd IB sa tunga sang ginapabugal nga state of Stable Internal Peace and Security (SIPS). #

Kriminal kag Kawatan sa Guihulngan nga Gina-uyatan sang 62nd IB, Ginsilotan sang NPA

*Ka JB Regalado, Tagpamaba sang LPC-NPA
Marso 24, 2024*

Sa pihak sang lapnagon kag masingki nga operasyon militar sa Central Negros, madinalag-on nga ginpatuman sang Leonardo Panaligan Command-New People's Army (LPC-NPA) ang silot kamatayon Kay Gamay Taganeli sang Crossing Bon-bon, Brgy. Hinakpan Guihulngan City, Negros Oriental sadtong Marso 20, 2024 alas 7:00 sang gab-i.

Si Taganeli ang brutal nga nagpatay kay Egling Carreon sang Sityo Bonbon, Guihulngan sadtong tuig 2023. Ginhatok-hatok paagi sa paglabo kag gin-salvage ang lawas ni Egling Carreon kag ginhaboy ini sa pil-as.

Samtang, si Jovanie Dela Cruz ang bantog kag masupog nga kawatan sang de kantidad nga mga kasapatan sang pumuluyo sa lugar. Masupog man nga asset-militar si Dela Cruz nga nagareport sa Brgy. Hinakpan-Guihulngan Patrol Base kag 62nd Batallion Headquarter sa Brgy Libas, Isabela, Negros Occidental. Tuyo nga arestuhon sang NPA si Dela Cruz upod sa iya anak nga si JR Dela Cruz apang nagbato ini sa mga NPA arresting officers rason man nga nakapalagyo si JR. Napilitan ang NPA sa pagdepensa sa kaugalingon. Ginpalukpan sang NPA operatives si Jovanie nga nagtuga sa iya kamatayon.

Lubos nga ginapasalamatan sang LPC-NPA ang wala paghubas nga suporta sang masa sa armadong paghimakas. Samtang ginkalipay

man sang mga pumuluyo ang madinalag-on nga opensiba sang NPA sa pagsabat sang madugay na nga ginapangita nga hustisya sang mga biktima. #

Ipatuman ang kahublagan panadlong! Manikasog para mapasulong ang inaway banwa sa isla sang Negros!

***Komiteng Rehiyunal sang Partido sa Isla sang Negros
Marso 29, 2024***

Pareho sang kasingkal sang init sang El Niño phenomenon subong, ang Komiteng Rehiyunal sang Partido sa Isla sang Negros (KRPIN) nagatanyag sang iya mainit kag rebolusyonaryong pagpanamyaw kag taas inumol nga pagsaludo sa tanan nga mga Pulang kumander kag hangaway sa idalum sang Apolinario Gatmaitan Command-New People's Army Negros Island Regional Operations Command (AGC-NPA), subong man sa bug-os nga rebolusyonaryong pwersa kag pumuluyong Negrosanon sa pagsug-alaw sa ika-55 nga anibersaryo sang New People's Army. Nakaganar naman kita sang isa ka tuig nga kadalag-an sa pagpaslaw sang demonyo nga kapintas sang rehimen US-Marcos II kag kadalag-an sa pagpasulong sa demokratiko nga rebolusyon sang banwa paagi sa pangmalawigon nga inaway banwa sa isla sang Negros.

Napagkit na sa kasaysayan ang palanublion nga ginbilin sang aton mga rebolusyonaryong martir kag baganihan kaangay nanday Rogelio Posadas, Ericson Acosta, Romeo Nanta, Kerima Lorena Tariman, Marilyn Badayos, Flor Ceballos kag iban pa nga naghalad sang ila kabuhi nga wala sang pagduha-duha dira sa taguankan sang rebolusyonaryong paghimakas sang pumuluyo para sa matuod-tuod nga kahilwayan kag demokrasya. Padayon nga magahatag sang inspirasyon sa mga masunod nga henerasyon sang mga rebolusyonaryo ang ila lubos nga kaisog kag kaalam dira sa pagpasulong sang rebolusyon.

Ginpamatud-an sang NPA sa isla ang determinasyon kag kabakud sa pag-atubang sa wala tupong nga mga sakrispisyong atubangan sang wala tupong nga terorismo sang estado nga ginbuhian sang rehimen US-Marcos II paagi sa iya ginpasingki nga mga focused military operation (FMO) kag Retooled Community Support Program (RCSP) sandig sa kamandoan sang imperyalismong US sa Armed Forces of the Philippines (AFP) nga tapuson na ang “internal security problem” (pangsulod nga problema pang-seguridad) agud mahatagan sang prayoridad ang “external defense” (pang-guwa nga depensa) ukon ang pagkonsentrar sa “paghanda para sa pagpangapin sang pungsod” kontra sa China nga sa esensya nagbutang sa pumuluyong Pilipino sa tunga sang nagahana nga paglupok sang inter-imperyalista nga gyera.

Bug-os tagipusuon nga ginapasalamatan sang Communist Party of the Philippines (CPP), NPA kag bug-os nga rebolusyonaryong pwersa ang wala sang pag-ugdaw nga pagpakigbahin kag wala sang paghubas nga pagsuporta sang malapad nga ginapigos kag ginahimuslan nga masang Negrosanon. Ang demokratiko nga rebolusyon sang banwa paagi sa pangmalawigon nga inaway banwa isa ka pangmasang paninguha. Kon wala ang ila pagpakigbahin sa rebolusyon, wala kag indi makasarang ang Partido kag NPA sa isla atubangan sa ala demonyo nga kapintas sang pasista nga rehimen US-Marcos II.

Wala sang tupong ang kalalaon sang krisis kag pag-usmod sang palangabuhian sa bug-os nga isla subong tuga sa lubos nga pagpatuman sang mga neoliberal nga polisiya sang imperyalismong US kag iban pa nga kontra-pumuluyo kag kontra-rebolusyonaryo nga mga tikang nga naga-apekto sa mayoriya sang pumuluyong mamumugon, mangunguma, mamumugon sa uma, mangingisda, propesyunal, intelektwal kag iban pa nga sakop sang petiburgesya sa syudad, lakip na ang mga pungsodnon nga burgesyag kag pila ka seksyon sang nagahari nga sahi. Nagdugang pa ang pagsarurot sang palangabuhian sang masa sa paglaslas subong sang lain naman nga natural nga kalamidad nga El Niño nga magalab-ot pa tubtob sa Mayo

sini nga tuig. Sa pila pa lang ka bulan, daku na ang halit nga natuga sa palangabuhian sang pumuluyo ilabi na sa kaumhan.

Sa nagalala nga sitwasyon subong masaksihan sang pumuluyo ang inutil, bangkarote, maki-kaugalingon kag maki-dumuluong nga tindog kag tikang sang rehimen US-Marcos II. Sa baylo nga sabton ang kinahanglanon sang pumuluyo, padayon nga ginapagsingki ang terorismo sang estado agud pahipuson ang sin-o man nga magsaway ukon magreklamo kag disgustado sa nagahari nga hubon ni Marcos Jr.

Ang pumuluyong Negrosanon muklat nga nagapangita sang banas sang matuod nga pagbag-o sang sosyedad, ang banas sang armadong rebolusyon nga ginapamunoan sang sahing proletaryado paagi sa iya nga Partido Komunista. Maathag sa ila nga ang armadong rebolusyon lamang ang solo nga solusyon sa mga sandigan nga problema sa isla kag sa bug-os nga pungsod. Isa ini ka makatarunganon nga gyera nga nagasabat sa handom sang pumuluyo sa paglab-ot sang matuod nga kahilwayan kag demokrasya, kag hustisya sosyal.

Ang bug-os nga rebolusyonaryong kahublagan nakaangkon sang bag-o nga kusog paagi sa subong nga kahublagan panadlong. Gani, ang Partido kag NPA upod sa tanan nga rebolusyonaryong pwersa sa rehiyon wala nagakahadlok sa mga pagpamintas kag pagpamahug sang reaksyonaryo nga pwersa kag handa sa lain naman nga hugna sang panghangkat nga nagakinahanglan sang mataas nga mga sakripisyo agud mapasulong ang inaway banwa sa mas mataas nga halintang tubtob sa kadalag-an upod sa malapad nga pumuluyong Negrosanon kag sa bug-os nga pumuluyong Pilipino.

Mga kadalag-an sang NPA kag pangmalawigon nga inaway banwa sa idalom sang absoluto nga pagpamuno sang Partido sa isla

Sa kabilogan, madinalag-on ang Partido kag NPA sa Negros sa

hambalanon sang armadong paghimakas tungod napaslaw na naman sini ang pabalik-balik nga handum sang pasista nga rehimen US-Marcos II kag iya armadong pwera nga dugmokon ang NPA sa isla. Napreserba sang NPA ang iya nga kusog kag napunggan ang dugang nga halit nga gindulot sang ginpasingki nga mga FMO kag RCSP sa mga larangan gerilya paagi sa pagtadlung sang mga kahuyangan sa pagpatuman sang gerilya nga pagpakig-away. Labi pa ka importante, sa isa ka halintang, nakapalapad kag nakahimo sang panugod nga pagtubo liwat halin sa mga dalagku nga kapaslawan tuga sang mga internal nga kahuyangan.

Sa pagkamatuod, napatuman sang NPA sa isla sa idalom sang absoluto nga pagpamuno sang Partido ang sentral nga hilikuton sini sa paglunsar sang demokratiko nga rebolusyon sang banwa paagi sa pangmalawigon nga inaway banwa bilang nagapanguna nga hinganiban sang Partido kag pumuluyo sa pagpukan sa mapiguson nga sahi, sa pagwasak sa mala-kolonyal kag mala-pyudal nga sistema, kag sa pagtukod sang demokratikong estado sang pumuluyo kag pagpanday sang sosyalistang sosyedad.

Ginpamatud-an sang NPA sa isla nga isa ini ka indi matay-og nga hukbo sang pumuluyo bangud nagapakig-away ini sa interes kag handum sang masa para sa matuod nga kahilwayan kag demokrasya. Bitbit sang mga Pulang kumander kag hangaway subong ang kaanggid nga kakahas kag determinasyon sang mga kumander kag hangaway sang NPA nga una nga nagpatuman sang armadong paghimakas sa isla kaangay nila Apolinario “Ka Boygat” Gatmaitan (rason nga ginhingadlan sunod sa iya ang rehiyunal nga kumand sang NPA sa Negros) upod ang mga mamumugon halin sa Victorias Milling Corporation lakip sila Bobby Nuñez kag Rene Villanueva sadtong 1969 kag ang mga nagsunod pa sa sulod sang 55 na ka tuig nga paglunsar sang armadong paghimakas sa isla kaangay nila Leonardo “Ka Jessie” Panaligan, Roselyn “Ka Jane” Pelle, Danilo “Ka Maoche” Bertolano, Rachelle Mae “Ka Hannah” Palang, Armando “Ka Pao” Sumayang Jr,

Romeo “Ka Ponso” Nabas, Romeo “Ka Juaning” Nanta kag Rogelio “Ka Cocoy” Posadas. Ang NPA subong sa isla sang Negros mas pa nga nagapamat-od sa pagpadayon kag pagpasingki sang inaway banwa sa rehiyon.

Halin sa 70 ka elemento sang NPA sa Central Negros nga nanindugan para sa sandigan nga prinsipyo sang Partido kag pag-upod sa Ikaduha nga Dungganon nga Kahublagan Panadlong (IDKP) sadtong 1994 subong man mga kadre kag katapoan sang Regional Mass Movement Commission kag Partisan Front Committee sa urban, kag pagfull-time sa kaumhan sang 78 ka kadre halin sa kasyudaran, nagtubo ang NPA sa Negros pakadto sa lima ka larangan gerilya. Wala mapapas sang reaksyonaryong pwersa ang NPA sa panahon nga iskwad lang ini sadtong 1969 ukon sang nagarekober pa paagi sa IDKP sadtong 1994-1998 tungod sa grabe nga kalibutanon kag lokal nga krisis nga nagadabok sa kalayo sang rebolusyon. Rason man ini nga tubtob subong, napaslawan ang kaaway sa pagdugmok sa rebolusyonaryo nga kahublagan sa isla nga padayon nga nagatungod kag nagapasulong sang tatlo ka integradong hilikuton sang pangmalawigon nga inaway banwa—paglunsar sang armadong paghimakas, pagpatuman sang agraryong rebolusyon kag pagtukod sang baseng masa.

Tuman ka manggaranon ang 55 ka tuig nga inagihan sa paglunsar sang armadong paghimakas sa isla. Magaserbe ini nga puhunan sang dugang nga pagsikad sa palaabuton nga mga tinuig. Dapat husto kag diyalektiko nga pamaagi nga tan-awon ang positibo subong man ang negatibo nga mga aspeto. Ang positibo nga mga aspeto amo ang puhunan sa pagsikad samtang ang mga leksyon sa negatibo nga nagabara sa pag-uswag sang inaway banwa mangin iwag sa pag-usoy liwat sa husto nga banas sa pakig-rebolusyon.

Ang mga internal nga kahuyangan sa ideolohiya, pulitika kag organisasyon ang kabangdanan sang mga paghuyang kag pag-atras sang nagligad nga mga tinuig. Nangibabaw subong ang sakit sang

suhetibismo nga nagapanguna nga dagway ang empirismo sa bug-os nga lawas sang Partido. Nagbunga ini nga sakit sa ideolohiya sang sakit sang Tuo nga oportunismo sa patag sang pulitika kag burukratismo sa patag sang organisasyon. Partikular sa patag sang armadong paghimakas, makita ang mabaskug nga sulog sang konserbatismo sa pulitika kag militar sang nagligad nga mga tinuig apang nagasugod na ang seryoso nga pagpaninguha sang mga yunit sang NPA sa isla agud mapangibabawan ini.

Sa lima ka tuig nga implementasyon sang Memorandum Order (MO) 32, nasarangan sang NPA sa Negros nga mapreserbar ang lima ka larangan gerilya bisan sa ginpasingki nga mga FMO kag RCSP sang kaaway nga naggamit sang pito ka batalyon sang AFP kag siyam ka kompanya pangmaniobra sang Philippine National Police (PNP). Nag-atubang ang kada larangan gerilya sang isa ka batalyon sang reaksyonaryong armadong pwersa ukon sobra pa. Makabig nga kadalag-an ang pagpaslaw sa kontra-rebolusyonaryo nga kampanya sang kaaway halin sa ulihi nga bahin sang 2018 pakadto sa una nga tatlo ka bulan sang 2024, apang sa proseso nakaagum man sang mga malala nga kahuyangan kag kasaypanan nga nagsablag sa dugang nga pag-uswag sang inaway banwa.

Nagkaon pa sang panahon antes nakahimo sang mga desaysibo nga tikang para sa amat-amat nga pagresolba sang “self-constriction” (pagpakitid sang kaugalingon) sa dagway sang pag-ubod-ubod sa mga komportable kag paborito nga lugar, kag tuman nga konsentrasyon ukon pagtipon sang daku nga pormasyon sa malawig nga panahon nga nagbunga sang mga desaysibo nga inaway nga indi paborable sa mga Pulang hangaway kag nakahalit sa baseng masa. Ginsolbar ang “self-constriction” sang mga larangan gerilya paagi sa pagtumod sa hilikuton ekspansyon nga nagbukas sa mga bag-o nga erya kag nagresulta man sa rekoberi sa pila ka lugar nga malawig nga ginbayaan kag may iban nga pila na ka dekada antes nabalikan.

Apang, wala ginpabay-an ang mga erya nga yara ang pokus sang kaaway.

Ang maayo nga resulta sang hilikuton ekspansyon sang mga larangan gerilya sa mga erya nga manipis ang pwersa sang kaaway ukon wala sila sang tropa nagapakita lang sang limitasyon sang pwersa sang reaksyonaryong rehimen nga maduphan ang kalaparon sang kaumhan sa isla sang Negros. Tungod naglapad ang erya nga nalab-ot sang hilikuton masa, amat-amat nga nabuslan sang mga bag-o nga rekrut ang mga yunit sang NPA. Husto lamang nga dugang pa nga palaparon ang mga larangan gerilya kag sonang gerilya nga lapaw sa masarangan nga sakupon sang tropa sang kaaway.

Nangin leksyon sa hilikuton ekspansyon ang disbentaha sa paggamit sang daku nga yunit sang NPA sa pagsulod sa bag-o nga erya nga nagakinahanglan man sang daku nga besingan kag suplay, mabudlay ang mobilidad kag nagabilin sang agi kabangdanan nga temprano namutikan sang kaaway. Nangin mahinay naman ang hilikuton ekspansyon sang gin-una ang matig-a nga erya imbes nga magpanugod sa mahumok. May kaso man nga nahigot sa “wala sang ihibalo sa gintumod nga erya nga buksan” amo nga wala gilayon ginpursige ang plano sa ekspansyon.

Ang mga natumod nga kahuyangan kaanggid sa sulog sang pagkampante kag pagkuntento sa ano lang ang nalab-ot kag sulog sang indi seryoso nga pagpalibog sa mga sirkumstansya. Ginpakanubo ang kapasidad sang kaaway kag may kahalugan sa disiplina militar. Gintumod kag ginsaway na ang mga ini kag yara na sa proseso sang pagpangibabaw.

Kadungan sa pagpatuman sang hilikuton ekspansyon, ginlubad ang problema sang tuman nga konsentrasyon paagi sa paggamit sang relatibo nga dispersal para sa hilikuton masa kag agud mas malapad nga erya ang malab-ot. Tungod sini, madamu nga mga kaupod ang

nahanas sa pagdumala sang nagkalain-lain nga pormasyon gerilya. Subong man, nasabat ang problema sa suplay, movilidad, besingan kag agi sang yunit. Gani, mas naglaka ang armadong engkwentro sa tunga sang militar kag hukbo sang banwa ilabi na sa ikaduha nga bahin sang 2023 tubtob subong.

Sa tunga sang sustenido kag dalagku nga mga FMO sang kaaway, wala nadula ang pagpaninguha sang NPA nga makalunsar sang mga taktikal nga opensiba sang nagligad nga tuig apang wala maangkon ang lubos nga kadalag-an sandig sa kinaiya sang gerilya nga pagpakig-away nga pagpadugo sa kaaway paagi sa libu-libo nga pilas sa lawas kag talagsa nga lampos sa ulo. Halin Enero 2023 tubtob Pebrero sini nga tuig, 62 ka aksyon militar ang nahimo sang NPA sa bilog isla nga nakaganar sang 22 ka armas kag iban pa nga kagamitan militar, kag nakahalit sa indi magnubo 70 ka elemento sang kaaway, sa diin 40 ang napatay sa inaway.

Talalupangdon nga tuman ka gamay ang sandigan nga taktikal nga opensiba ikompara sa mga atritibo kag punitibo nga aksyon. Isa ini ka dagway sang konserbatismo militar. Nangin kahuyangan ang kakulang sang matinugahon nga plano ilabi na sa hambalanon sang hilikuton paniktik, kulabos man sa pagpangusisa sa kahimtangan sang kaaway partikular sa mga huyang sini, kag may kabudlayan pa ang pila ka Pulang kumander sa pagdumala sa tunga-tunga nga bahin sang inaway nga magseguro sang madinalag-on nga pagkompiska sang armas, kag iban pa.

Sa pagpasulong sang inaway banwa, padayon ang pagtinguha sa rehiyon sa pagpataas sang kapasidad sa inaway hambalanon sang pagplano sa larangan gerilya kag sa tunga sang mga larangan kag sa ila nga pagdumala kag koordinasyon nga tuman nga kinahanglanon para sa dugang nga movilidad, pleksibilidad kag inisyatiba. Ginapundar ang mga teatro sang gyera nga may paborable nga tereyn sa mga utlanan sang mga banwa kag syudad, may kombinasyon sang

bukid kag patag nga kadutaan, mga suba kag kasapaan, kag may angot sa kaingod nga mga larangan gerilya kag mga sentro sang pulitika. Hangkat subong ang dugang pagpabakud sa mga larangan gerilya kag ang pagtukod sang dugang pa tubtob mapundar ang mga malapad nga teatro sang gyera kag mapauswag ang kompleto nga istruktura sang pwersa sang NPA, sang lokalidad tubtob sa yunit milisya kag yunit pangdepensa sa baryo, subong man sang mga yunit partisano para sa mga espesyal nga mga operasyon sa mga sentrong urban.

Malahalon ang pagpakigbahin sang masang mangunguma sa paglunsar sang pangmalawigon nga inaway banwa. Ang NPA isa man ka hukbo sang mangunguma. Ang mga lubos panahon nga Pulang hangaway sa isla ginasuportahan sang linibo-libo nga masang Negrosanon kag ginapabakud sang ginatos ka mga katapo sang yunit milisya kag yunit pang-depensa sang mga rebolusyonaryong organisasyon masa bilang dugang kag reserba nga kusog sang NPA. Daku ang ila papel sa paghimo nga lapnagon ang gerilya nga pagpakig-away paagi sa paghimo sang mga atritibo nga aksyon kag mga magagmay nga sandigan nga taktikal nga opensiba. Apang indi pa lubos nga napasangkad ang ikasarang sang ini nga kusog sang pumuluyo kag dapat nga mahatagan sang nagakaigo nga igtalupangod.

Atubangan sa sustenido nga mga FMO kag RCSP sang kaaway, padayon nga nakatigayon sang hilikuton edukasyon nga pang-ideolohiya, pangpolitika kag pangmilitar kag nakalunsar sang mga paghanas sa sulod sang hukbo. Apang daku pa ang trabahuon sa edukasyon pangpolitika sa kubay sang baseng masa tungod indi amo sina kapagsik kag nagalinapta ang implementasyon.

Amat-amat nga nakabawi ang pwersa sang NPA sa isla tungod sa pagpalapad sang ispasyo nga mas ligwa para sa hilikuton masa. Apang daku pa ang kinahanglan hikuton para lubos nga makarekober

kag makapangibabaw sa ala demonyo nga mga atake sang kaaway. Nasolbar man ang paglikaw sa mga desaysibo nga inaway apang tuman ka kulang ang napadaug nga mga sandigan nga taktikal nga opensiba upod sa gamay lang nga napatuman nga agraryong rebolusyon kag mga kampanyang masa. Kon magpabilin ang ini nga sitwasyon, mangin mabudlay ang pagpataas sa halintang sang gerilya nga pakig-away kag pagpatubo sang mga organisasyon masa.

Magamay kag nagalinapta pa ang nalab-ot sa pagpatuman sang agraryong rebolusyon sa isla, ilabi na sa hambalanon sang sweldo kag benepisyo sang mga mamumugon sa katubohan sa idalum sang isa ka monocrop nga industriya sang kalamay. Daku nga amot sa ini nga problema ang kahuyangan kag kakulangan sa hilikuton SICA. Sa pihak nga bahin, yara pa sa panugod nga lebel ang paglunsar sang rehiyunal nga kampanya partikular sa implementasyon sang mga neoliberal nga polisiya sa isla sa dagway sang nagkalain-lain nga mga proyekto kaangay sang reklasipikasyon kag reklamasyon sa duta agud himuon nga mga “super” kag “smart” cities ang mga dalagku nga sentrong syudad sa isla (mga syudad sang Bacolod, Dumaguete kag Kabankalan) kag himuon ini nga sentro sang rehiyunal nga mga talatapan; pagpasulod sang komersyal nga plantasyon sang Palm Oil, mga makahalalit nga operasyon mina kag quarry, kag mga renewable energy pareho sang windmill kag solar farms; pribatisasyon sang mga publikong utilidad pareho sang kuryente kag tubig; “modernisasyon” sang mga dyip; liberalisasyon sang humay kag kalamay; kag iban pa.

Bilang tigpangapin sang interes sang imperyalismong US kag lokal nga mga alipures sini nga dalagku nga komprador burgesya kag agalon mayduta, desperado ang AFP kag PNP upod ang National Task Force (NTF)-Elcac sa pagpatuman sang prinsipyo nga “pahubsan sang tubig ang isda agud mapatay ini.” Daku nga bahin nga gintum-ok sang kaaway ang punta sang ila pusil sa ila ginakilala nga rebolusyonaryong baseng masa, ilabi na sa ila ginakabig nga mga konsolidadong erya sang NPA, paagi sa sostenido kag dalagku nga

mga FMO kag RCSP. Nakaagom sang grabe nga mga paglapas sang tawhanon nga kinamatarung ang madamu nga mga komunidad sang mangunguma sa Negros.

Halos 700 na ka insidente ang namonitor nga pagpang-abuso sa tawhanon nga kinamatarung sa isla sang Negros sa idalum sang poder ni Marcos Jr. Masobra 46,000 ang mga biktima, lapit libo sini ang mga kabataan. Nagsabwag ini sang grabe nga kahadlok sa pumuluyong Negrosanon. Apang upod sa pagpapagsik liwat sang NPA, amat-amat man nga nagtipon sang kaisog ang masang Neg-rosanon agud atubangon ang militarisasyon sa kaumhan.

Sa kasyudaran, padayon man ang kontra-imperyalista, kontra-pyudal kag kontra-pasista nga kampanya nga nagasabat sa internasyunal, nasyunal kag lokal nga mga panawagan kag isyu nga naga-apekto sa malapad nga katawhan. Gintipon sang ligal nga demokratikong kahublagan ang pagbato sang pumuluyo sa mga neoliberal nga palisiya nga ginpatuman diri sa Negros, mga makahalit nga mina kag quarry, pagtaas sa presyo sang gasolina kag mga sandigan nga kinahanglanon sang katawhan, mga reklamasyon sa baybay, pribatisasyon sang tubig kag kuryente, pag-phaseout sang mga dyip, mga palas-anon nga buhis sa mga sandigan nga balaklon, kag ang pagpanghilabot sang US kag China sa West Philippine Sea.

Ginapakamalaut kag ginapanawagan sang pumuluyong Negrosanon ang pagbasura sa Maharlika Investment Fund, confidential funds kag National Task Force (NTF)-Elcac. Naglanog man sa bilog nga isla ang singgit para sa hustisya, pagpa-untat sa militarisasyon sa kaumhan, kag pagbalik sa istoryahanay pangkalinong sa tunga sang Government of the Republic of the Philippines (GRP) kag National Democratic Front of the Philippines (NDFP). Nag-upod man ang ligal nga kahublagan masa sa bug-os nga kalibutan sa panawagan nga untaton na ang pagpamigos sa pumuluyong Palestino kag tapuson na sang Israel ang pagpanakop sa Gaza.

Maayo kay amat-amat man nga nagrekober ang ligal nga demokratikong kahublagan halin sa grabe nga atake sang reaksyonaryo nga pwersa sa ila nga kubay sugod pa sa panahon sang rehimen Duterte. Ginapundar man sini ang pinakamalapad nga nagahiliugyon nga prente batok sa paantus, korap, kag pasista nga rehimen US-Marcos Jr. Daku ang naamot sang mga tawong simbahan para sa pagpapagsik sang kampanyang masa sang nagligad nga tuig. Maisogon kag determinado ang mga aktibista kag progresibong mga organisasyon bisan ginapuntirya sang reaksyonaryong estado kag nangingin biktima sang nagkalain-lain nga mga dagway sang paglapas sang tawhanon nga kinamatarung.

Sa kabilogan, yara sa panugod nga pagpaninguha ang kahublagan masa sa kasyudaran sa pagpangibabaw sa mga sulog sang Tuong oportunismo sa dagway sang repormismo, legalismo kag iban pa. Sa giya sang Partido, buhi ang pagtinguha nga tukuron liwat ang mapag-on nga kahublagan masa sa kasyudaran nga magahamulag sa nagahari nga hubon sang nagahari nga sahi kag magatapna sa pagpadala sa kaumhan sang dugang nga pwersa militar kontra sa pumuluyo kag mga rebolusyonaryong pwersa sa mga larangan gerilya.

Bisan ang armado nga paghimakas ang prinsipal nga porma sang rebolusyonaryo nga paghimakas subong samtang wala pa naagaw ang gahum pangpulitika sa bug-os nga pungsod, ang ligal nga porma sang paghimakas sa kasyudaran ginakabig nga sekundaryo apang indi mapahigad nga porma sang paghimakas. Katimbang ini sang armado nga paghimakas sa kaumhan.

Mga mahangkaton nga mapang-away nga hilikuton sa palaabuton nga tuig

Ang Partido paagi sa KRPIN ang nagapamuno sa pagsulong sang rebolusyon sa kaumhan kag kasyudaran sa isla sang Negros. Mabakud kag hugot ang paghiliusa sang mga kadre kag katapo sang Partido,

upod ang mga Pulang kumander kag hangaway sang NPA, sa pagduso sang rebolusyonaryong hilikuton kag katungdanan sa tunga sang nagasingki pa nga terorismo sang estado. Puno sang rebolusyonaryong optimismo nga mapangibabawan ang mga kahuyangan kag kakulangan sa ideolohiya, politika kag organisasyon, labi pa nga pursigido ang rebolusyonaryong pwersa sa pagpatuman sang mga mahangkaton nga hilikuton sa sini nga tuig agud masulong ang pangmalawigon nga inaway banwa sa isla sa mas mataas nga halintang kag makaamot sa pangkabilogan nga pag-abanse sang demokratiko nga rebolusyon sang banwa sa bug-os nga pungsod.

Lubos nga resolbado ang Partido, NPA kag bug-os nga rebolusyonaryong pwersa sa rehiyon sa pagpatuman sang kahublagan panadlong nga ginpanawagan sang Komite Sentral kag Ikaduha nga Kongreso sang CPP sadtong 2016 sa basehan sang Marxismo-Leninismo-Maoismo (MLM) kag mga sandigan nga prinsipyo sang Partido. Ginagamit sini nga iwag ang sumada sang mga inagihan sang rehiyon sa pagpangibabaw sa mga natumod nga sakit sa ideolohiya, politika kag organisasyon nga nakabara sa kumprehensibo nga pag-uswag sang rebolusyon sa isla. Kinahanglan nga mangin maayo sa pagkat-on kag gilayon nga magkuha sang leksyon halin sa mga positibo kag negatibo nga inagihan, subong man sa mga leksyon halin sa kaaway.

Absoluto ang pagpamuno sang Partido sa NPA nga nagakahulugan nga ang politika ang magamando sa pusil. Militante nga manguna ang Partido nga yara sa nagkalain-lain nga pormasyon sang hukbo sang banwa tubtob sa mga rebolusyonaryong organisasyon masa sa pagpatuman sang rebolusyonaryong linya, mga hilikuton, patakaran, polisiya kag disiplina. Ginapasiguro ang edukasyon pang-ideolohiya kag pangpolitika sang mga Pulang kumander kag hangaway, lakip na ang mga paghanas sa ila. Ipaathag sa ila ang mga sandigan nga prinsipyo sang pungsodnon-demokratiko nga rebolusyon paagi sa

pangmalawigon nga inaway banwa nga may sosyalistang perspektiba kag ang tatlo ka integrado nga hilikuton sang inaway banwa.

Ginapat-od sang Partido ang epektibo nga pagpahulag sang mga pwersa sang NPA kag ang paghatag sang husto kag maathag nga mga instruksyon sa hilikuton. Gina-usisa man sini ang pag-uswag sang pagpatuman sang mga rebolusyonaryong hilikuton, kag ginadumalahan ang mga pagtasa kag pagsaway kag pagsaway sa kaugalingon sa kubay sang NPA.

Ang mapagsik nga pangpolitika nga hilikuton sa sulod sang NPA ang magapataas sang kamuklatan kag kagustohan nga makig-away sang mga Pulang kumander kag hangaway kag malig-on nga magpanday sang ila espiritu nga mag-alagad sa pumuluyo. Ginapabakud sini ang paghiliusa sang hukbo sang banwa kag mga masa kag sa tunga sang mga opisyal kag hangaway. Ginasakdag man sini ang demokrasya sa patag sang ekonomiya, politika kag militar sa sulod sang NPA.

Sa palaabuton nga tuig, magluwas sa padayon nga pagpaslaw sa handum sang kaaway nga wasakon ang rebolusyonaryong kahublagan sa isla sang Negros, kinahanglan nga dugang mapadaku ang kusog sang NPA sa hambalanon sa erya kag pwersa. Yabe diri ang madamu nga madinalag-on nga daku kag gagmay nga taktikal nga opensiba, malapnagon nga paglunsar sang kontra-pyudal nga paghimakas kag mga kampanyang masa katimbang ang madasig nga pagpalapad kag pagkonsolida sang baseng masa sa bilog nga isla. Kon maayo nga mapatuman ang tatlo ka integradong hilikuton, seguridad nga mangin tuburan ini sang rebolusyonaryong kusog para sa pagsulong.

Ipadayon ang pagpangibabaw sa mga kahuyangan sa “self-constriction” kag tuman nga konsentrasyon sang mga yunit sang NPA. Mangin maalamon sa pag-aplikar sang gerilyang taktika sa konsentrasyon, dispersal kag shifting santo sa sitwasyon sang gyera. Anihon kag pauswagon ang nalab-ot sa hilikuton ekspansyon. Dugang

palaparon kag padalumon ang mga erya sa tanan nga larangan gerilya. Tinguhaon nga makapalapad guwa sa masarangan nga sakupon sang mga FMO kag RCSP agud mas mangin ligwa ang maniobra kag matigayon ang hilikuton masa, militar kag iban pa nga kumprehensibo nga hilikuton. Subong man, mangin matinugahon sa pagrekoher kag pagmentina sang mga konsolidado nga erya agud magiyahan ang mga masa sa ila nga pagbato kag pag-atubang sa mabaskug nga atake sang kaaway.

Sa pagpatuman sang rebolusyonaryong hilikuton, dapat ginasanto ang pormasyon sang NPA sa ikasarang sang baseng masa kag sa kinaiya kag hulag sang kaaway. Himuon nga kahublagan ang sekreto nga paghulag agud indi gilayon matublag ang pagrekoher sa baseng masa kag ang hilikuton ekspansyon.

Malahalon nga aspeto sa pangmalawigon nga inaway banwa ang inaway gerilya sang masa. Daku ang katapoon sang aton yunit milisya kag iban pa nga mga pormasyon sang lokal nga gerilya. Kinahanglan nga mapataas man ang ila ikasarang sa pagtuon sa sitwasyon sang gyera, ihibalo sa mga teknika kag taktika sang kaaway, disiplina militar, sekreto nga paghulag kag mga gerilyang taktika kag operasyon bilang nagapanguna nga makinarya sang NPA sa isla para sa paglunsar sang mga opensibang aksyon.

Santo sa nagasingki nga mga FMO kag RCSP, mangin matinugahon kag mapasibuon sa pagkonsolida sang tanan nga mga pwersa—sa Partido, NPA kag rebolusyonaryong masa. Padayon nga ilunsar ang mga pang-Partido nga pagtuon kag ang PADEPA sa NPA, mga lokal nga gerilya nga pormasyon kaangay sang yunit milisya, kag mga organisasyon masa ilabi na tuhoy sa mga sandigan nga prinsipyo kag patakaran sang Partido kag mga sinulat nanday Kaupod Mao Zedong, Kaupod Ho Chi Minh kag Kaupod Jose Maria Sison partikular sa inaway banwa. Tagaan man sang prayoridad ang politiko-militar nga paghanas sang mga Pulang hangaway kag yunit milisya kag ang

sandigan nga kurso para sa mga opisyal para dululungan ang pag-uswag sang ihibalo sa rebolusyon kag ikasarang sa inaway. Seguraduhon ang kaluwasan sa pagpatigayon sang mga pagtuon kag paghanas.

Ikampanya ang pagtuon sang sumada sang rehiyon agud mauyatan ang mga leksyon sa positibo kag negatibong inagihan sa nakaligad nga lima ka tuig nga pakigrebolusyon. Maglunsar man sang mga pagtuon sa mga sandigan nga dokumento nga gintalana sang Komite Sentral kaangot sa paglunsar sang kahublagan panadlong. Ini nga mga pagtuon nagatinguha sa pagpangibabaw sang empirisismo sa dagway sang mekanikal nga estilo sang pagtuon kag pagtrabaho kag sa paghibalo kag paghanas sa pag-aplikar sang MLM sa kongkretong kahimtang sa Pilipinas kag pagpauswag sang aton rebolusyonaryong praktika.

Para sa pagpundar sang mga teatro sang gyera, kinahanglan nga maghimo sang desaysibo nga plano sa pagpabakud sang mga larangan gerilya kag pagsira sang mga bulho sa tunga sang mga ini. Importante nga sangkap ang paglab-ot sang mga larangan gerilya sang tipikal nga istruktura sang pwersa nga isa ka kompanya nga may platun bilang sentro de grabidad kag ang iban nga mga yunit gerilya nagalapta sa mas malapad nga radyus. Kinahanglan man pauswagon ang pagpamuno kag koordinasyon agud maangkon ang mas daku kag pinakamaayo nga ikasarang sang rebolusyonaryong kusog.

Daku ang papel sang madinalag-on nga mga sandigan nga taktikal nga opensiba nga ginasuportahan sang mga atritibo nga mga taktikal nga opensiba sa pangkabilogan nga pagrekober kag pagpapagsik sang rebolusyonaryo nga kahublagan sa isla sang Negros. Napamatud-an na sa rebolusyonaryong inagihan sa isla nga ang paglunsar sang mga taktikal nga opensiba nga makaya nga daugon naton nagapabaskog sa NPA kag sa bug-os nga rebolusyonaryong kahublagan. Gani, kinahanglan kita maglunsar sang sustenido kag makahason nga mga

taktikal nga opensiba sandig sa masarangan sang aton kusog. Pangitaon ang huyang nga bahin sang kaaway kag magpauswag sang mga bag-o nga taktika. Sa gihapon, magtuon kita sa pagpakig-away dira sa inaway.

Kasubong sa paglunsar sang madinalag-on nga taktikal nga opensiba, kinahanglan man ang lapnagon nga paglunsar sang agraryong rebolusyon kag iban nga kampanyang masa. Desaysibo sini ang hilikuton SICA (ukon pangsosyedad nga imbestigasyon kag pag-analisar sang mga sahi) sa mga organo sang Partido kag mga yunit sang NPA agud matumod ang mga yabe nga isyu nga maka-papukaw, makapa-organisa kag makapahulag sa mas madamo kag malapad nga masa. Importante nga mapataas man ang aton ikasarang sa paglunsar sang mga kampanya halin sa lebel sang sityo kag inter-sityo, hasyenda kag inter-hasyenda pakadto sa inter-baryo, munisipal, distrito tubtob sa lebel sang probinsya kag rehiyunal nga sakop.

Ang pagpatuman sang agraryong rebolusyon yabe man sa madasig nga pagkonsolida kag pagpalapad sa baseng masa. Samtang nagapalupok sang mga kontra-pyudal nga paghimakas kag iban pa nga mga kampanyang masa, segurohon nga upod sini ang pagtukod sang organisasyon masa. Dapat mapangibabawan ang kahuyangan nga makuntento lang sa paglunsar sang kampanyang masa tubtob sa pagmobilisa sa mga masa apang wala sang katumbas nga pagtukod sang solido nga kusog sang masa paagi sa pagtukod sang mga nagkalain-lain nga mga sandigan nga organisasyon masa sang mga mangunguma, mamumugon sa uma, kababainhan, pamatan-on, mga bata, grupong pangkultura, mangingsida kag iban pa.

Ang mga kampanyang masa makapadasig sa pag-ani sang pinakamaayo nga mga rekrut para sa Partido kag NPA. Paagi sini makapatuhaw sang mga bag-o nga mga masang aktibista kag lider kag mapaaktibo liwat ang mga nagluya kag daan nga mga pwersa. Apang, dapat mangin mabinantayon sa pagbaton liwat pasulod sa

rebolusyonaryong kubay sang mga nagpahuway kag nagsurender. Dapat mag-agi sa proseso sandig sa patakaran kag may maid-id nga pagpangusisa sang tagsa-tagsa ka sirkumstansya. Magbantay sang maayo nga indi makapasulod sang bisan isa ka malain nga elemento.

Ang paglunsar sang kampanyang masa dapat man nga magbunga sang paglapad sang nagahiliugyon nga prente ilabi na sa mga nahanunga nga pwera, lakip na ang mga manggaranon nga mangunguma kag pungsodnon nga burgesya kag bisan pila sa kubay sang nagahari nga sahi kaangay sang nasanagan nga mga agalon mayduta kag mga pulitiko.

Daku nga bahin sang sini nga tuig ang paglaslas sang El Niño sa aton pungsod. Lapnagon ang mas malala nga kagutom kag kabudlayan sa palangabuhian sang pumuluyo nga tuga sang sini nga kalamidad ilabi na sa kaumhan. Segurado nga imbes salbaron ang pumuluyo, unahon sang reaksyonaryo nga gobyerno ang ila magan-it sa pondo sang kalamidad samtang daw bao ang pagtanyag sang bulig sa masa. Ginapaabot man nga mas pasingkion pa sang AFP/PNP/NTF-Elcac ang mga operasyon militar, operasyon paniktik kag mga civil-military operation nga sa esensya nagapanginto sa pumuluyo sa mga komunidad sang mangunguma nga magdugang pa sa pag-antus sang masa.

Dapat mapamunoan ang masa sa ila paghimakas sa tion sang El Niño kaangay sang pagpanukot sa reaksyonaryong gobyerno sang bulig kag subong man, ibuyagyag ang puno sang korapsyon, pagka-makikaugalingon kag pagka-inutil sa pag-agap sa mga masa sang rehimen US-Marcos II. Ilunsar man ang mga kampanya sa produksyon sa nagkalain-lain nga dagway pareho sa pagtukod sang mga sistema sang patubig kag iban nga pamaagi nga magpauswag sa produksyon bisan panahon sang tuman ka mala kag init. Diri mas matuhay sang masa ang kinalain sang NPA kag sang reaksyonaryong AFP, PNP kag mga paramilitar nga grupo sa hambalanon sang

matuod nga pagbulig sa masa. Paagi man sini amat-amat nga mapangibabawan sang masa ang kahadlok kag mabutang sa dependsiba ang kaaway.

Ang madinalag-on nga kampanyang masa makahatag man sang kahigayunan nga makapalapad sa mga bag-o nga erya kag malab-ot ang mga erya nga indi pa kaya nga lab-oton sang NPA. Kinahanglan magpadala sang mga tim nga mag-atipan sa hilikuton sang pagpreparar sang sonang gerilya ilabi na sa mga erya sa higad hi-way, higad suba, higad baybay kag patag kag mga sentrong banwa.

Indi mapahigad sang Partido ang malahalón nga papel sang ligal nga demokratiko nga kahublagan sa kasyudaran sa pagpabaskog sang armadong paghimakas sa kaumhan. Kinahanglan nga mapabaskog ang mga mobilisasyon masa sandig sa mga dalagku nga isyu nga ila nga ginaatubang subong ilabi na ang pagpatuman sang neoliberal nga polisiya diri sa isla sang Negros. Sa hugot nga pag-angot sa mga isyu sang masa sa kasyudaran sa kontra-pyudal nga mga isyu sa kaumhan, mapalanog ang pagka-makatarunganon sang armadong paghimakas.

Dapat papagsikon ang mga hayag nga organisasyon masa kag tukuron ang malapad kag madalom nga likom nga mga organisasyon masa kag network. Lakip sa hilikuton sa kahublagan masa sa kasyudaran ang pagtukod sang pinakamalapad nga nagahiliugyon nga prente nga magtuga sang biak sa kubay sang nagahari nga sahi kag tay-ugon ang kaaway nga sahi sa ila nga balwarte. Ang dako nga talaksan sang kadalag-an sang kahublagan masa sa kasyudaran ang madamu nga rekrut para sa NPA, para sa kahublagan mangunguma kag iban pa nga mga hilikuton nga nagasuporta sa armadong paghimakas sa kaumhan. Subong man, makapatuhaw ini sang suporta lohistika kag materyal kag iban pa nga rekurso para sa armadong paghimakas.

Ang NPA ang nagahatag sang inspirasyon sa kahublagan masa sa kasyudaran. Gani, ginabaton sini ang mga rebolusyonaryo nga indi na

makasarang sa paghulag sa kasyudaran tungod sa masingki nga red-tagging kag pagsalbeyds sa mga aktibista kag lider masa.

Labi nga maathag subong nga ang Partido kag ang NPA ang matuod nga nagapanindugan sa interes kag kaayuhan sang pumuluyong Negrosanon kag sa bug-os nga pumuluyong Pilipino batok sa pagduso sang neoliberal nga polisiya kag programa sa isla kag sa kapid sini nga pagsingki sang terorismo sang reaksyonaryong estado. Mas nagadalom pa ang suporta sang malapad nga masa sa rebolusyonaryong armadong paghimakas. Subong sang sa nagliligad, talalupangdon nga ang demokratiko nga rebolusyon sang banwa paagi sa pangmalawigon nga inaway banwa ang isa ka makatarunganon nga gyera, subong man, makatarunganon ang magrebolusyon. Sa sini nga basehan, ang NPA isa ka hukbo nga indi mapukan bisan san-o man.

Isulong ang interes kag kaayuhan sang pumuluyong Negrosanon kag bug-os nga katawhan Pilipino!

Pamatukan ang neoliberal nga polisiya sang imperyalismong US paagi sa reaksyonaryong estado sang mga dalagku komprador burgesya kag agalon mayduta!

Paslawon ang mga FMO kag RCSP sang kaaway!

Tapuson ang terorismo sang reaksyonaryong estado kag lab-uton ang hustisya sosyal!

Isulong ang demokratiko nga rebolusyon sang banwa paagi sa pangmalawigon nga inaway banwa sa mas mataas nga halintang!

Mabuhay ang CPP-NPA-NDF! #

Pursigido nga Tادلungon ang mga Kasaypanan kag Isulong ang Inaway Banwa sa Mas Mataas pa nga Halintang

*Ka JB Regalado, Tagpamaba sang LPC-NPA
Marso 29, 2024*

Sa okasyon sang ika-55 ka tuig nga anibersaryo sang New People's Army gikan sa pagkatukod sadtong Marso 29, 1969, ang Leonardo Panaligan Command-New People's Army (LPC-NPA) sa Central Negros nagasingkal, nagabalingaso nga kainit kag militante nga nagabayaw sang amon mga inumol tanda sang pursigido nga pagtadlong sang mga kahuyangan kag padayon nga pagsulong sang masobra lima na ka dekada nga armadong paghimakas sa pungsod tubtob sa lubos nga kadalag-an.

Kadungan sini, nagasaludo man kita sa aton mga rebolusyonaryong martir nga naghalad sang ila mga kinaalam, kaisog kag makatarunganon nga nagsakripisyo sang ila kabuhi sa pag-angat sang inaway banwa paagi sa boluntaryo kag matutom nga paghikot sa pagpatuman sang integradong rebolusyonaryong hilikuton sang demokratikong rebolusyon sang banwa padulong sa sosyalismo. Ginapasidunggan naton sila Jose Maria “Ka Joma” Sison, Benito “Ka Laan” Tiamson, Wilma “Ka Bagong-Tao” Austria, Jorge “Ka Oris” Madlos, Rogelio “Ka Cocoy” Posadas, Ericson “Ka Fredo” Acosta, Romeo “Ka JM” Nanta, Leonardo “Ka Jessie” Panaligan kag iban pa nga mga kaupod. Ginapasidunggan man sila Bernard Torres, Dionesio Baloy, Jose Albores, Evelyn kag Julieven Meren, Orlando Fat, Victor Baldonado, Christina Jacolbe kag Everly Kee Jacolbe kag iban pa halin sa hanay sang pumuluyo diin wala-kaluoy kag brutal nga ginpamatay

sang mga pasista kag berdugong 62nd IB sa Central Negros.

Sila ang buhi nga handumanan kag magserbe nga inspirasyon sa aton padayon nga pagsulong sang armadong rebolusyon. Ang ila mga inagihan kag kontribusyon ang magapabilin sa aton paminsaron kag balatyagon nga magsindi kag magpasingkal sang kalayo sang rebolusyon sa mga kaumahan sang bug-os nga larangan gerilya.

Ginapasalamatan man naton ang wala-paghubas nga suporta sang malapad nga masa sang pumuluyo kag wala-kataka nga paggiya sang Communist Party of the Philippines (CPP) sa Bag-ong Hangaway sang Banwa sa pagpangibabaw sa tunga sang mga internal nga kahuyangan. Subong man, ang pagpangibabaw sa bug-os nga rebolusyonaryong kahublagaan batok sa masingki nga pagpamintas kag pagpang-atake sang Armed Forces of the Philippines (AFP), Philippine National Police (PNP) kag iban pa nga makinaryas sang reaksyonaryong estado.

Bangud sang pursigido kag ululupod nga paghimakas sang bug-os nga rebolusyonaryong kahublagaan dira sa pag-isa sang nagkalain-lain nga sahi sa balayon sang nagahiliugyon nga prente, mas aktibo nga nagpabilin ang pagluntad sang mga larangan gerilya ilabe na ang LPC-NPA sa Central Negros sa pihak sang tudo-gyera nga kampanya militar, pasismo kag terorismo sang rehimen ni US-Marcos Jr.

Sa kahiwatan sang ika-55 nga pagsukat sang NPA, ginasaulog naton ini nga puno sang militansiya bangud sang aton mga kadalag-an sa tanan nga patag sang pagsulong kag pag-uswag sa sulod sang isa ka tuig (Marso 29, 2023-Marso 29, 2024), sa pihak man sang pagpugong sang AFP, PNP, NTF-Elcac kag iban pa nga makinaryas sang reaksyonaryong estado.

Sa patag sang armadong paghimakas; taas moral kag ara ang inisyatiba nga nagapadayon sa pagtungod sang integrado nga

hilikuton masa paagi sa pagpakamaayo sa linyang masa. Paagi sini, nakarekrut sa gihapon sang halos seksyon nga kusog sang Pulang hangaway halin sa hanay sang mga pamatan-on. Boluntaryo sila nga nagsumiter sang ila kaugalingon sa lubos panahon nga mag-alagad sa masang ginahimuslan kag ginapigos nga pumuluyo sa kaumhan dira sa pagpakigbahin sa NPA. Nangin maayo ang mga Pulang hangaway sa pagkumbinar sang pagbalhin, konsentrasyon kag dispersal nga moda sa paghulag gerilya dira sa platun bilang sandigan nga pormasyon.

Sa tunga sang focused military operation (FMO) kag Retooled Community Support Program (RCSP), madinalag-on nga nakalunsar ang LPC-NPA sang konsentrado nga paghanas politiko-militar kag madinalag-on man nga nakalunsar sang indi magnubo sa 12 ka taktikal nga opensiba nga nagpatay sang kapin 16 gikan sa hanay sang tropa militar diin nakapatuhaw sang mga armas nga sarang ipa-armas sa bag-ong napatapo sa NPA kag iban pa nga yunit gerilya. Sa pihak nga bahin, lima ang nangin rebolusyonaryong martir sa mga Pulang hangaway nga sanday Ka Kris, Ka Marnie, Ka Bryan, Ka Dagger kag Ka Ryan.

Namentinar man ang kusog sang mga yunit gerilya nga nangin katimbang sang NPA sa pagtungod sang mga hilikuton masa paagi sa tatlo ka integrado nga hilikuton (pagtukod sang baseng masa, agraryong rebolusyon kag pagsulong sang armadong paghimakas).

Paagi sini, nasusteni ang pagpalapad kag konsolidasyon sa baseng masa. Namentinar ang 38,000 nga organisadong masa nga may malapit 200,000 nga isip sang baseng masa. Bunga sang hilikuton pagpalapad, dugang nga naabot ang 2,000 nga isip sang baseng masa halin sa malapit 80 ka baryo kag 400 ka sityo nga nahulagan katumbas sang tatlo ka larangan gerilya. Tuman ka ligwa ang paghulag sang mga yunit gerilya nga naghatag sang taas nga inisyatiba sa NPA kag bug-os nga rebolusyonaryong kahublagan agud

palapitan ang malapad nga masa kag pursigido nga matungdan ang mga rebolusyonaryong hilikuton kaangay sang edukasyon masa, hilikuton propaganda, kultural, arbitrasyon, produksyon, ikaayong-lawas, seguridad kag iban pa.

Sumugod nga nagpungko sa poder si Marcos Jr, sa Central Negros lang, nakarekord sang 22 ka mangunguma ang brutal nga ginpamatay samtang lima naman ka hors de combat nga mga Pulang hangaway sa Moises Padilla, Negros Occidental kag Canlaon City, Negros Oriental ang hungod nga gin-utas ang ila kabuhi sa mga tropa sang 62nd IB sa pagpamuno ni Col. William Pesase Jr bilang Commanding Officer. Naglab-ot man sa 336 ka insidente sang human rights violations ang hinimoan sa nasambit nga militar nga nag-imbolbar sa masobra 10,800 ang biktima (212 sini ang mga menor de edad). Sa bilog isla sang Negros, responsable ang 62nd IB sa halos katunga sa 654 nga kaso sa pagpanglapas sa tawhanon nga kinamatarung nga nagbiktima sa indi magnubo sa 46,000 (988 sini ang mga menor-edad) nga narekord sang National Democratic Front (NDF)-Negros idalum sa rehimen US-Marcos II.

Bangud sini nga mga panghitabo, mahapos para sa mga Pulang hangaway kag iban pa nga mga yunit gerilya ang pagpukaw, pag-organisa kag pagpahulag sa masa. Nangin mahagup kag malapit ang masa sa NPA kag bug-os nga rebolusyonaryong kahublagan. Dasig nga naglab-ot sang masobra 2,000 ka pumuluyo ang naabot sang hilikuton edukasyon kag propaganda. Nakalunsar sang mga epektibo nga pagtuon sa PADEPA kag edukasyon-propaganda sa hanay sang masa kabangdanan sang pagka-anting, sekreto kag aktibo nga paghikot sini diin dugang nga pagpatapo sa mga bag-ong natukod nga organisasyon masa sang PKM, KM, MAKIBAKA kag ARMAS sa lebel sityo tubtob munisipalidad. Samtang ngipon sa ngipon nga nagpakig-away kag nagbuyagyag paagi sa rebolusyonaryo, makatarunganon kag Marxista nga propaganda batok sa mga kabutigan, pagpatalang, pagpanginto kag korapsyon sang AFP, PNP kag NTF-Elcac ilabe na sang inutil,

pasista, papet kag korap nga rehimen US-Marcos Jr.

Sa sulod sang isa ka tuig, ang NPA naglunsar man sang mga serbisyo-sosyal kaangay sang medikal, literasiya-numerasiya kag iban pa. Malapit sa 1,000 ang nahatagan serbisyo medikal samtang ang mga kabataan sang masa ang ginlunsaran man sang libre nga pagtuon sang literasiya kag numerasiya. Halos ang tanan nga yunit sang NPA kag iban pa nga yunit gerilya ang nakalunsar man sang arbitrasyon sa pagsolbar sang mga kontradiksyon sa tunga sang masa kaangay sa pagsolbar sang mga problema sa duta, palangabuhian kag iban pa.

Paagi sa giya kag pagpanguna sang NPA, nangin kinaandan na sa Central Negros ang ululupod kag kolektibo nga pagbinuligay sang masang katapuan paagi sa simple nga kooperasyon agud padasigon kag pataason ang ila produksyon sa pagpanguma. Nangin kinaandan man sa rebolusyonaryong masa kag NPA ang pagbinuligay sa tion sang mga kalamidad sa pihak sang grabe nga pag-antus sa kaimulon bunga sang kakulang sang serbisyo-sosyal kag ka-inutil sang mga rehimen ilabe na ni Marcos Jr.

Karun nga kalamidad sang tig-ilinit (El Niño), naghiliusa ang masa sa paghimakas upod sa NPA agud pukawon, organisahon kag pahulagon ang malapad nga pumuluyo sa kaumhan para pangibabawan ang nasambit nga kalamidad kag ang militarisasyon nga ginkabig bilang kalamidad man tuga sang pasismo kag terorismo sang estado. Namobilisa kag napahulag ang masa sa pagpanghawan kag pagpalapad sang ulumhan nga ila palangabuhian, pagpangita sang tubig nga mainom kag tubig nga para sa ila mga talamnan kag iban pa nga pananom. Kadungan man sini ang pagtigayon sang alternatibo nga pagpamulong sa epidemya nga sakit nga gina-atubang sang pumuluyo sa kaumhan resulta sang kasingkal sang init kaangay sang ubo, hilanat, trangkaso, high-blood, stroke kag iban pa. Samtang nagatungod man sang hilikuton masa sa pagpukaw, pag-organisa kag pagpahulag sa pumuluyo sa pagduso sang ila mga demokratikong

kinamatarung kag interes agud kuhaon ang epektibo nga sabat sang inutil, korap, papet kag reaksyonaryong gobyernong US-Marcos Jr.

Ang malawigon nga krisis sa resesyon sang sistemang kapitalismo ang magtuga sang pag-eskalar sang gyera sa bug-os nga kalibutan. Mas mag-igting imperyalista kontra sa mga kolonyal, neo-kolonyal kag mala-pyudal nga mga pungsod, kapitalista batok sa mga mamumugon kag pag-alsa sang mga pumuluyo batok sa pagpamigos sang mga kapitalista sa kaugalingon nga pungsod. Samtang mag-isa ang sahing proletaryado sa bug-os nga kalibutan nga maghimakas para sa isa ka pagbag-o sosyal.

Sa sini nga kaangtanan, tuman ka paborable ang sitwasyon sa pungsod ang pagsulong sang demokratikong rebolusyon sang banwa padulong sa sosyalismo. Ang papet nga rehimen ni Marcos Jr ang ginabayo subong sang masingki nga krisis sa ekonomiya kag pulitika. Nagamanipestar ang maigting nga banggianay sa tunga sang Duterte batok Marcos Jr nga hubon idalum sa kroniko nga krisis sang mala-kolonyal kag mala-pyudal nga sosyedad Pilipino. Wala sang malauman ang kadam-an nga pumuluyo sa lunsay nga maki-dumuluong, elitista, pasista kag papet nga rehimen US-Marcos II. Paagi lamang sa pag-usoy sa husto nga banas sang armadong rebolusyon maangkon sa pigos kag ginahimuslan lakip ang malapad nga pumuluyo ang ginahandum nga matuod nga demokrasya kag pungsodnon nga kahalwayan. .

Tampad nga tul-iron ang mga kahuyangan nga nagasagabal sa aton pag-uswag kag pagsulong! I-angat ang inaway banwa sa mas mataas nga halintang sa masunod nga mga panag-on.

Mabuhay ang Demokratiko nga Rebolusyon sang Banwa!

Mabuhay ang CPP-NPA-NDF!

Mabuhay ang masa!

Mabuhay ang ika-55 nga Anibersaryo sang New People's Army! #

Itib-ong ang pungsodnon demokratiko nga rebolusyon! Paigrabon ang kalayo sang inaway banwa!

*Ka Andrea Guerrero, Tagpamaba sang ASJC-NPA
Marso 29, 2024*

Ang Armando Sumayang Jr. Command-New Peoples Army (ASJC-NPA) nagapaambit sang amon malipayon kag militante nga pagsaludo sa tanan nga mga Pulang Kumander kag hangaway, mga kadre sang Partido, kag sa tanan nga mga rebolusyonaryo nga pwersa ilabi na diri sa Sur nga bahin sa isla sang Negros sang aton ika-55 nga pagsukat sang NPA. Ginahatagan man naton sang pasidungog ang tanan nga mga rebolusyonaryong martir, partikular sa ila Chenée Dacalos (Ka Nikki), Jeren Vargas (Ka Alvin), Ka Rickoy (Bobby Pedro), Ka Goring (Mario Mullon), Ka Bombo (Alejo delos Reyes) kag Ka Diane (Melissa dela Peña), nga naghalad sang ila kabuhi agud mahawanan ang banas sang rebolusyon.

Malipayon kag mapagsik naton nga gina abi-abi ang panawagan sang Partido Komunista sang Pilipinas (PKP) nga manadlong kag pabakuron ang tanan nga rebolusyonaryo nga pwersa agud mapangibabawan ang mga kasaypanan kag kahuyangan sa tanan nga patag sang rebolusyonaryo nga hilikuton. Isa ini ka malahalón nga tikang agud mapasaka naton ang lebel sang aton inaway banwa sa mas mataas pa nga halintang.

Subong nga todo larga ang pagduso sang rehimen ni US-Marcos Jr. sang mga neoliberal nga mga polisiya sa ekonomiya, labi nga nagatambok ang duta sa Sur sang Negros para sa rebolusyon. Ginpasulod sang reaksyonaryo nga gobyerno ang pagpatanum sang palm oil kag ang liwat nga pagbuhi sa mga minahan, pabor sa mga

interes sang dumuluong kag mga dalagko kumprador burgesya. Lapnagon man ang kawad-on sang palangabuhian, pagpang-agaw sang duta paagi sa National Greening Program (NGP) kag Integrated Forest Management Agreement (IFMA), nubo nga sweldo kag benepisyo, pagmina, demolisyon, kag relokasyon sa higad baybay nga nagpahalin sa ginatos ka mga mangingisda nga lubos nga nagapaantos sa mga pumuluyo.

Sa bilog probinsya sang Negros Occidental, ang ika-6 nga distrito ang isa sa natam-an sang grabe nga tig-ilinit bangud sa El Niño. Ginpalala pa ini sa pabaya kag korap nga reaksyonaryo nga rehimen US-Marcos II nga wala sang ginhatag nga nagakaigo nga sabat sa kahalitan nga gintuga sang El Niño. Amo ini ang isa sa mga kabangdanan nga indi malikawan sang mga pumuluyo nga magduso sa tanan nga porma sang paghimakas armado man ukon ligal.

Magabato ang hukbo kag pumuluyo. Nakaagum man kita sang mga kapaslawan kag kahuyangan sang nagligad nga mga tuig sandig sang aton nga pagtasa, apang sa pihak nga bahin, nagmadinalag-on kita subong sa pagpalapad kag nakakonsolida sang aton nga mga pwersa bisan sa malapnagon nga mga operasyon kombat sang Armed Forces Of he Philippine (AFP) kag Philippine National Police (PNP). Paagi sang aton pag-uyat sang mga sandigan nga prinsipyo kag taktika sang pagpakig-away gerilya, mahimo naton nga mapasumbag sa hangin ang kaaway kag mapabilin sila nga bulag kag bungol. Ini nagapamatuod nga ang NPA hugot nga nakaugat sa malapad nga masang ginapigos kag ginahimuslan. Superyor man ang kaaway sa kagamitan militar, apang ina nga superyoridad ginahimun-an sa wala-tupong nga pagsuporta sang malapad nga masa sang pumuluyo sa NPA, ang ila matuod nga hangaway. Paagi sang aton hugot nga paghiliusa, liwat naton nga mapapagsik ang aton rebolusyonaryo nga makina.

Ang ASJC-NPA tampad kag bug-os tagipusu-on nga pas-anon ang mabug-at kag hinanali nga mga tahas sang agraryo nga rebolusyon, pagpalapad sang baseng masa kag pagpapagsik sang armado nga paghimakas. Padayon kami nga magbalik-tuon sa mga sandigan nga prinsipyo kag teorya sang Marxismo-Lenimismo-Maoismo agud husto nga madapat ang mga taktika kag pamaagi sa paglunsad sang inaway gerilya agud lubos pa nga maalagaran ang masa. #